

Exodo

Kéwà katô mga rubbad i Israel tikud tun ta Ehipto

Una Basan

Tô kóbadan kani kagi “Exodo” kéwà. Ni libro tingód katô mga rubbad i Israel na inallang tun ta banuwa ka Ehipto, asta tingód katô kéwà dan. Si Moises tô igsulat kani libro ni. Sikandin tô igsalin ka Manama ébô mid katô mga rubbad i Israel tikud tun ta Ehipto.

Tun ta libro ka Exodo duwán kappatan kapitulo, asal igubad dád tô tángngà, sippang tun ta bersikulo 17 ka kapitulo 20. Tun ta una kapitulo sippang tun ta kapitulo 14, mabasa tô tingód katô kéwà dan tun ta kallang kandan. Tun ta kapitulo 15 sippang tun ta kapitulo 18, mabasa tô tingód katô kapanó dan tun ta Pabungan ka Sinai. Tun ta kapitulo 19 sippang tun ta kapitulo 20, mabasa tô tingód katô Sapulù Sugù katô Manama kandan.

Ihirapan tô mga rubbad i Israel tun ta Ehipto

¹ Ni gó tô mga gabatà gamama i Jacob^a asta tô tagsábbad-sábbad pamilya dan na igtákkás kandin tun ta Ehipto. ² Si Ruben, si Simeon, si Levi, si Juda, ³ si Isacar, si Zabulon, si Benjamin, ⁴ si Dan, si Neftali, si Gad, asta si Aser. ⁵ Tô timpo tô, taganà dán si Jose dutun ta Ehipto. Tô langun kani mga gamama na rubbad i Jacob igdunggù ka kapittuwanan (70).

^a **1:1** 1:1 Si Jacob, ó si Israel.

⁶ Na, tō iglabé dán tō pira ámmé, inaté si Jose, tō mga kataladi din, asta tō langun manubù na manté tō timpo i Jose. ⁷ Asal marapung tō mga gabatà dan asta mga apù dan. Ándà kadugé, igmarapung tō mga rubbad i Israel, asta italap dan gó tun ta kaluwagan ka banuwa ka Ehipto.

⁸ Na, duwán mantu harì tun ta Ehipto na ándà sóddór din tingód ki Jose. ⁹ Igkagi sikandin katô mga sakup din, na mà din, “Tuu marapung asta tuu pa mabákkár tō mga rubbad i Israel ka tandingán áknita. ¹⁰ Purisu kailangan mamasak ki ka kapókit ébô dì dan kumarapung, su atin ka duwán gira, malát dan tun ta mga usig ta, matu dan áknita, asta miwà dan tikud tun ta banuwa ta.”

¹¹ Purisu igimu dan tō mga rubbad i Israel na iring na mga állang, asta duwán mga taga Ehipto na igimu na amo dan, su kakalyag dan na kahirapan tō mga rubbad i Israel ukit ka kalumu dan katô mabággat. Igpírit dan na igapému katô mga lunsud ka Pitom asta Rameses ébô duwán áglimudanan katô mga ágkakan para katô harì ka Ehipto. ¹² Agad tuu dan igaahirapan katô mga taga Ehipto, asal tuu gó igmarapung tō mga rubbad i Israel, asta italap dan tun ta Ehipto. Purisu ágkamáddangan tō mga taga Ehipto tingód katô mga rubbad i Israel. ¹³ Purisu tuu dan igaahirapan tō kóddô katô mga rubbad i Israel. ¹⁴ Tuu dan gó igaahirapan su igapirit dan igapému ka mga materyales ka balé asta áglumu kada álló tun ta mga kinamát. Ándà kédu dan kandan.

¹⁵ Na, igkagiyan katô harì ka Ehipto si Sipra asta si Pua na mga mabaliyan katô mga gabayi

ka Hebreo, na mà din, ¹⁶ “Atin ka gawat kó katô mga gabayi ka Hebreo, matayi yu tô mga gabatà gamama, asal yakó yu ágmatayi tô mga gabatà gabayi.”

¹⁷ Asal tuu ágkamáddangan tô mga mabaliyan tun ta Manama. Purisu ándà dan bánnali tô sugù katô harì. Ándà dan matayi tô mga gabatà gamama. ¹⁸ Na, igpatawar katô harì sikandan, asta iginsà, na mà din, “Manan man ka ándà yu bánnali tô sugù ku ákniyu na kailangan matayan yu tô mga gabatà gamama?”

¹⁹ Igtaba dan, na mà dan, “Sir, magani tô mga gabayi ka Hebreo, asta sékót dan gó ágpamasusu, su tô dì ké pa ágdunggù, áglássut dán tô gabatà dan. Dì dan ágkatággasan iring katô mga gabayi ka taga Ehipto.”

²⁰⁻²¹ Tingód katô máddang ka mga mabaliyan tun ta Manama, inéduwan tô Manama kandan, asta igbággayan din sikandan ka mga pamilya. Purisu tô mga rubbad i Israel ágpanayun na ágrubbad, asta inalayun dan igmabákkár.

²² Na, igsugù katô harì tô langun sakup din, na mà din, “Antug yu tun ta Wayig ka Nilo tô langun gabatà gamama ka Hebreo na mantu ipamasusu, asal yakó yu gapili tô mga gabatà dan gabayi.”

2

Ipamasusu si Moises

¹ Na, duwán sábbad mama asta sábbad bayi tun ta mga rubbad i Levi na igpakalyagé. ² Igmabáddás tô bayi, asta igpamasusu ka mama. Igkita din na madigár é bónnóng katô batà, asta igállás din

dalám ka tállu bulan. ³ Asal su dì dán gó mému állássán tô batà, igkangé katô innà din tô sábbad basket na igimu tikud tun banbanb na igtapóngan ka ispalto ébô dì makahu tô wayig. Igdalám din tô batà tun ta basket asta igtindág tun ta ligad ka wayig na sigbáttán. ⁴ Igtindág tun ta madiyù puri tô tábbé katô batà ébô sumállág ka mamánnu tô batà.

⁵ Ándà kadugé, igdunggù tô prinsesa tun ta wayig ébô madigus, róggun igpanó-panó tô mga ágsuguánnán din tun ta ligad katô wayig. Igkita katô prinsesa tô basket tun ta ligad ka wayig na sigbáttán, asta igsugù din tô ágsuguánnán din ébô kangén. ⁶ Igpókéan katô prinsesa tô basket asta igkita din tô batà. Igsággó tô batà, asta inéduwan tô prinsesa kandin. Igkagi sikandin, na mà din, “Hebreo ni batà ni.”

⁷ Na, igpadani tô tábbé katô batà, asta iginsà din tô prinsesa, na mà din, “Malyag ka na mangéya ka sábbad innà ka Hebreo ébô pasusun din ni batà para áknikó?”

⁸ Igtaba tô prinsesa, na mà din, “Óó. Kangé ka gó.”

Purisu igpalaguy tô bayi, asta igkangé din tô innà katô batà. ⁹ Igkagi tô prinsesa kandin, na mà din, “Pid nu ni batà, asta pasusu nu sikandin. Tandanán ku sikuna.”

Purisu igpid katô innà tô batà din, asta igpasusu din.

¹⁰ Tô dakál dán puri tô batà, igpid katô innà din tun ta prinsesa, asta igimu katô prinsesa na

b ^{2:3} 2:3 Banban tô mallayat sigbát iring na balagán na ággamitán para gimun basket asta digu.

kandin sarili batà. Igkagi sikandin, na mà din, “Igkangé ku sikandin tikud tun ta wayig.” Purisu igngadanan din tô batà ki Moises.^c

Igpalaguy si Moises tun ta Midian

¹¹ Na, tô iglabé tô pira ámmé asta dakál dán si Moises, duwán álló na igahà sikandin katô mga unawa din na Hebreo, asta igkita din na ágpiritán dan ágpalumun ka mabággat. Igkita din tô sábbad taga Ehipto na áglagpás katô sábbad Hebreo na állang. ¹² Igsérê-sérê si Moises agó duwán kumita kandin, igmatayan din tô taga Ehipto, asta igtambunan din ka baklayan. ¹³ Pagkasimag, iglónód puman sikandin, asta igkita din tô duwa Hebreo na ágpamatayé. Igkagiyán din tô ikasalà, na mà din, “Manan ka áglagpássán nu tô unawa nu?”

¹⁴ Igtaba sikandin, na mà din, “Ándin é katundanan nu? Sadan tô igimu áknikó na mangulu asta rumuud áknami? Matayanna ikuna iring katô kamaté nu katô taga Ehipto bani?”

Tuu imáddangan si Moises, su igpanámdám sikandin na ikasóddór kannê tô langun manubù tingód katô iglumu din.

¹⁵ Na, tô ikasóddór tô harì katô iglumu i Moises, kakalyag din na matayan si Moises. Asal igpalaguy si Moises tun ta Midian.

Tô igdunggù dán si Moises tun ta Midian, igunsad sikandin madani tun ta sábbad balun.

¹⁶ Na, duwán parì ka Midian na si Jetro, asta duwán pittu gabatà din gabayi. Ágsadun tô mga gabayi tun ta balun ébô mangé ka wayig

^c **2:10** 2:10 Tô ngadan Moises, iring katô kagi ka Hebreo, “igkangé.”

na inámmán katô mga karnero asta mga kambing katô ámmà dan. ¹⁷ Asal duwán ássa mga taradóppón ka karnero na ágdunggù, asta ágpéwaán dan tô mga gabayi asta tô mga mannanap dan. Asal igtabangan i Moises tô mga gabayi ébô dì dan péwaán, asta igkangé din tô wayig ébô minám tô mga mannanap dan.

¹⁸ Tô igulì dan tun ta ámmà dan na si Jetro, d'iginsà sikandin, na mà din, “Manan ka sékót kó ikolí?”

¹⁹ Igtaba dan, na mà dan, “Duwán sábbad taga Ehipto na igtabang áknami, asta ándà ké péwai katô ássa mga tarabanté ka karnero. Igkangé pô gó sikandin ka wayig para áknami, asta igpénám din tô mga mannanap dé.”

²⁰ Iginsà tô ámmà dan, na mà din, “Ánda sikandin? Manan ka ándà yu gó patákkássi? Lónódi yu sikandin, asta pasadun yu dini ébô kuman sikandin duma áknita.”

²¹ Ignunug si Moises, asta igtákkás kandan. Igóddô sikandin tun kandan, asta igpakalyagan i Jetro ki Moises tô batà din na si Sefora. ²² Na, ighbatà si Sefora ka mama, asta igngadanan i Moises tô batà din ki Gerson,^e su mà din, “Ánnà a tigbanuwa kannun.”

²³ Tô iglabé dán tô pira ámmé, inaté tô harì ka Ehipto. Asal tuu pô gó mappait tô kahirapan katô mga rubbad i Israel tingód ka kallang kandan. Igpédu-édu dan ka tabang ka Manama kandan. ²⁴ Igpaminág tô Manama katô mga arangán dan,

d **2:18** 2:18 Duwán ássa ngadan i Jetro na si Reuel. e **2:22** 2:22 Tô ngadan Gerson, iring katô kagi ka Hebreo, “ánnà a tigbanuwa.”

asta isampáttan din tō kasabotan din ki Abraham, ki Isaac, asta ki Jacob. ²⁵ Igkita din na mappait tō minókitan katō mga rubbad i Israel, asta inéduwan sikandin kandan.

3

Igtawar katō Manama si Moises

¹ Na, igdóppón si Moises katō mga karnero asta mga kambing katō ugang din na si Jetro na parì tun ta Midian. Duwán sábbad álló na igrpid din tō mga mannanap tun ta disyerto sippang tun ta Sinai na pabungan ka Manama.^f ² Igpakita kandin tō panaligan na YAHWEH^g na Áglangngagán tun ta mabbabà kayu na ágrágrág. Isalábbuan si Moises su agad igrágrág tō mabbabà kayu, asal ándà kagóbbó. ³ Igpanámdám sikandin, na, “Manan ka ándà gó kagóbbó tō mabbabà kayu? Padaniyan ku, asta ahaán ku ni kasalábbuan ni.”

⁴ Tō igkita tō YAHWEH na igrpadani si Moises, igtawar sikandin tikud tun ta tángngaan katō mabbabà kayu, na mà din, “Moises, Moises!”

Igtaba si Moises, na mà din, “Kannunna.”

⁵ Igkagi tō Manama, na mà din, “Yaka ágpadani. Lusut nu yan sandalyas nu, su ugis ni lugar na ágtindággan nu. ⁶ Sakán tō Manama na ágpangadapán katō mga kamónaan nu. Sakán tō ágpangadapán i Abraham, si Isaac, asta si Jacob.”

^f **3:1** 3:1 Pabungan ka Manama, ó pabungan na igsunnadan katō Manama. ^g **3:2** 3:2 Tun ta kinagiyán ka Hebreo: YAHWEH, ó Jehovah. Tō mga Hebreo ágkamáddangan na kumagi katō ngadan na YAHWEH, su tun ta panámdám dan na tuu ugis tō ngadan katō Manama. Purisu tō igkagi dan, iggamit dan tō ngadan “Adonai,” na kóbadan Áglangngagán.

Purisu igtambunan i Moises tō báttuk din su imáddangan sikandin agó kasállággan din tō Manama.

⁷ Igkagi tō Áglangngagán, na mà din, “Igkita ku na igpahirapan tō mga sakup ku tun ta Ehipto, asta igdinág ku tō karangin dan kanak tingód katô madat mga amo dan. Isóddóran ku tō katiis dan katô mga kahirapan. ⁸ Purisu igsunnadda ébô paluwaán kud sikandan tikud tun ta bállad katô mga taga Ehipto, asta péwaán kud sikandan tikud tun ta banuwa ka Ehipto. Piddán ku sikandan tun ta ássa banuwa na madigár gó asta tuu malambù. Bággén ku kandan tō kaluwagan katô banuwa na igóddóan katô mga Canaanhon, mga Hetihanon, mga Amorihanon, mga Perisihanon, mga Hebihanon, asta mga Jebusihanon. ⁹ Igdinág ku tō karangin katô mga rubbad i Israel, asta igkita ku na tuu dan igpahirapan katô mga taga Ehipto. ¹⁰ Purisu papiddán ku sikuna tun ta harì ka Ehipto. Sikuna tō mid katô mga sakup ku na mga rubbad i Israel tikud tun ta Ehipto.”

¹¹ Asal igkagi si Moises, na mà din, “Mabbabà é kamanubuan ku. Dì mému na sakán tō pasadunán nu tun ta harì ébô mid katô mga rubbad i Israel tikud tun ta Ehipto!”

¹² Igkagi tō Manama, na mà din, “Tákkássan ku sikuna, asta pángnga péwaán ku sikiyu na mga rubbad i Israel tikud tun ta Ehipto, mangadap kó langun kanak nit pabungan ni. Ukit kani, kasóddóran nu na sakán tō igpapid áknikó.”

¹³ Asal igkagi si Moises tun ta Manama, na mà din, “Atin ka sadunan ku tō mga rubbad i Israel, asta kagiyán ku sikandan, na ‘Tō Manama na

ágpangadapán katô mga kamónaan ta tô igpapid kanak dini ákniyu,’ dì dan mánnał kanak, su minsà sikandan na, ‘Sadan tô ngadan kani manama ni?’ Ándin é taba ku kandan?”

¹⁴ Igkagi tô Manama, na mà din, “Sakán gó tô sakán. Kagiyi nu tô mga rubbad i Israel, na ‘Tô ágpatawar katô sarili din na sakán, sikandin gó tô igpapid kanak dini ákniyu.’”

¹⁵ Na, igkagi puman tô Manama, na mà din, “Ni gó tô kagin nu tun ta mga rubbad i Israel, ‘Tô YAHWEH na Áglangngagán na Manama na ágpangadapán katô mga kamónaan yu sayyan na si Abraham, si Isaac, asta si Jacob, sikandin gó tô igpapid kanak dini ákniyu.’ Ni gó tô ngadan ku sippang ka ándà ágtamanán. Ni gó tô ngadan ku na kailangan gamitán katô langun rubbad yu ka dumasał dan kanak.

¹⁶ “Saduni nu asta limud nu tô mga ágpangulun katô mga rubbad i Israel, asta kagiyi nu sikan-dan, ‘Tô YAHWEH na Áglangngagán na Manama na ágpangadapán katô kamónaan yu na si Abraham, si Isaac, asta si Jacob, tô gó tô igpakita kanak. Igkagi sikandin, na mà din: Isóddóran ku asta igkita ku tô mga madat na iglumu katô mga taga Ehipto ákniyu. ¹⁷ Tumandô a ákniyu na péwaán ku sikiyu tikud tun ta kahirapan yu tun ta Ehipto. Piddán ku sikiyu tun ta banuwa na igóddóan katô mga Canaanhon, mga Hetihanon, mga Amorihanon, mga Perisihanon, mga Hebihanon, asta mga Jebusihanon. Tuu gó malambù tô tanà dutun.’ ¹⁸ Maminág tô mga ágpangulun áknikó. Patákkás ka kandan tun ta harì ka Ehipto, asta kagiyi

yu sikandin, na, ‘Igpakita áknami tō Áglangngagán na Manama na ágpangadapán katô mga Hebreo. Purisu pasadun ké tun ta disyerto tun ta kadiyuán na tállu álló panón ébô mággé ké katô kailangan bággén tun ta Áglangngagán na Manama dé.’ ¹⁹ Asal isóddóran ku na dì kó gó papanón katô harì ka Ehipto sippang ka kasóddóran din na tuuwa matulus. ²⁰ Purisu gamitán ku tō katulusan ku, asta supakan ku tō mga taga Ehipto ukit katô mga kasalábbuan na lumun ku. Ukit katô lumun ku, papanón din sikiyu ébô miwà kó. ²¹ Ukit katô lumun ku kandan, respetowan kó katô mga taga Ehipto. Purisu ka miwà kó, tuu dakál tō bággén dan ákniyu asta piddán yu. ²² Tō tagsábbad-sábbad bayi na mga rubbad i Israel mamuyù katô mga simbalé dan na taga Ehipto asta tikud tun ta mga gabayi na góddô tun ta balé dan. Pamuyuán dan tō mga umpak, tō mga salagbat, tō mga pangkis, asta tō mga bulawan arites. Pómpak yu ni tun ta mga gabatà yu. Ukit katô kapamuyù yu kandan, piddán yu tō langun kaduwánnan katô mga taga Ehipto.”

4

Igbággé katô Manama tō katulusan ki Moises

¹ Igtaba si Moises katô Áglangngagán, na mà din, “Asal dì mánnal tō mga rubbad i Israel kanak. Dì dan maminág katô kagin ku kandan, su kumagi dan, na, ‘Ándà gó pakita tō Áglangngagán áknikó,’”

² Igkagi tō Áglangngagán, na mà din, “Ándin yan gawidan nu?”

Igtaba si Moises, na mà din, “Tukád ku.”

³ Igkagi tô Áglangngagán, na mà din, “Dabù nu yan tun ta tanà.”

Tô igdabù dán i Moises tô tukád din tun ta tanà, minému na áppuy, asta igañaguy si Moises. ⁴ Na, igkagi tô Áglangngagán, na mà din, “Awidi nu yan ikug din.”

Purisu igawidan i Moises tô ikug, asta inému dán puman na tukád. ⁵ Igkagi tô Áglangngagán, na mà din, “Lumu nu ni kasalábbuan ébô mánnal dan na igañaguy áknikó tô Áglangngagán na Manama na ágpangadapán katô mga kamónaan dan na si Abraham, si Isaac, asta si Jacob.”

⁶ Na, igkagi puman tô Áglangngagán ki Moises, na mà din, “Dalám nu yan bállad nu yan ta umpak nu.”

Igbánnal si Moises, asta tô igañaguy din tô bállad din, isalábbuan sikandin su iglamputì dán tô bállad din ka tétek.^h ⁷ Igkagi tô Áglangngagán, na mà din, “Dalám nu puman yan bállad nu yan ta umpak nu.”

Igbánnal si Moises, asta tô igañaguy din tô bállad din, isalábbuan gó sikandin, su minólian dán iring katô tibuk lawa din. ⁸ Igkagi tô Áglangngagán, na mà din, “Atin ka dì dan maminág áknikó asta ka dì dan mánnal tingód katô una kasalábbuan, mánnal dan kani ikaduwa kasalábbuan. ⁹ Asal ka dì dan mánnal kani duwa kasalábbuan, asta ka dì dan maminág katô ágkagin nu, kangé ka ka wayig ka Nilo, asta busbus nu tun ta tanà, su tô wayig mému na dipanug.”

¹⁰ Igkagi si Moises, na mà din, “Áglangngagán, ándà gó kakatigan ku na gulit-ulit, agad dáñngan

h ^{4:6} 4:6 Tétek, ó sanla.

ó agad nigó ukit katô katóngkô nu kanak. Asal diya tuu pakabólós,ⁱ asta ándà sóddór ku ka ándin tô madigár kagin ku.”

¹¹ Asal igkagi tô Áglangngagán kandin, na mà din, “Sadan tô igimu katô mga manubù ébô makakagi dan? Sadan tô igimu katô mga manubù na ómmó, ó bingál, ó makakita, ó bólög? Sakán dát na Áglangngagán tô makému! ¹² Purisu panó ka, su tabangan ku sikuna ébô nángngà tô kakagi nu, asta ultán ku áknikó ka ándin tô kagin nu.”

¹³ Asal igkagi si Moises, na mà din, “Áglangngagán, pasinsiyayiya. Atin ka mému, ássa dát tô suguán nu.”

¹⁴ Purisu isókó tô Áglangngagán ki Moises, asta igkagi sikandin, na mà din, “Duwán kataladi nu na si Aaron na Levita. Ikasóddórra na katig sikandin ágkagi-kagi. Igpanó dán sikandin ébô sumumar áknikó. Kadayawan sikandin ka kumita áknikó.

¹⁵ Sikandin dát tô pakagin nu katô kakalyag nu kagin. Tabangan ku sikiyu kumagi, asta kagiyan ku sikiyu ka ándin tô lumun yu. ¹⁶ Si Aaron tô taraulit katô kagi nu tun ta mga manubù. Méring ka na Manama tun ki Aaron, su mulit sikandin katô kagi nu, iring na propeta na gulit katô kagi ka Manama tun ta mga manubù. ¹⁷ Pid nu yan tukád nu, su yan gó tô gamítán nu ébô imun nu tô mga kasalábbuan.”

Iglónód si Moises tun ta Ehipto

¹⁸ Na, iglónód si Moises tun ta ugang din na si Jetro, asta igkagi sikandin, na mà din, “Atin ka

ⁱ **4:10** 4:10 Pakabólós, ó pakabalós. Magunawa tun ta 6:12,30.

mému áknikó, lumónódda tun ta mga gakád ku tun ta Ehipto ébô kasóddóran ku ka manté pô sikan-dan.”

Ignunug si Jetro, asta igkagi sikandin, na mà din, “Mólà pa ka madigár tô kapanó nu.”

¹⁹ Tô ándà pa panó si Moises tikud tun ta Midian, igkagi tô Áglangngagán kandin, na mà din, “Lónód ka tun ta Ehipto, su inaté dán tô langun manubù na malyag mimmaté áknikó.”

²⁰ Purisu igpid i Moises tô sawa din asta tô mga gabatà din gamama, asta igpasaké din tun ta asno. Igsadun dan tun ta Ehipto. Igpid din tô tukád na igpapid ka Manama kandin. ²¹ Igkagi tô Áglangngagán ki Moises, na mà din, “Atin ka dumunggù kad tun ta Ehipto, imu nu gó tô mga kasalábbuan tun ta tubang katô harì ukit katô katulusan na ighbággé ku áknikó. Asal patággasán ku tô ulu din ébô dì din péwaán tô mga rubbad i Israel. ²² Kagiyi nu tô harì, ‘Ni gó tô kagi katô Áglangngagán áknikó: Tô mga rubbad i Israel iring gó na sarili batà ku, iring na tambang kaké batà ku. ²³ Igkagiyan ku sikuna na kailangan péwaán nu tô batà ku ébô mangadap sikandin kanak. Asal su igéllé ka, matayan ku tô tambang kaké batà nu mama.’”

²⁴ Tô igdággà dan tun ta dalan, igpadani tô Áglangngagán tun ki Moises ébô matayan pád sikandin. ²⁵ Asal igawid si Sefora ka matam batu, asta igtupuwan din tô batà din. Igpólét din tô kindal na igtampád tun ta pusù din.^j ²⁶ Purisu ándà

^j **4:25** 4:25 Tun ta kinagiyán ka Hebreo, “pusù din.” Ándà kasóddóri ka pusù katô batà i Sefora ó pusù i Moises.

matayi katô Áglangngagán si Moises. Na, igkagi si Sefora ki Moises, na mà din, “Sikuna tô duma ku na igdaddasan ka dipanug!” Tô gó é igkagi din tingód katô katupu din katô batà din.

²⁷ Na, igkagi tô Áglangngagán ki Aaron, na mà din, “Sadun ka tun ta disyerto, asta sumar nu si Moises.”

Purisu igpanó si Aaron, asta igkita din si Moises tun ta Sinai na pabungan ka Manama. Tô igpakitaé dan, igadákkan din si Moises. ²⁸ Igulitan i Moises si Aaron katô langun na igkagi katô Áglangngagán kandin tingód katô lumun din asta kagin din. Igulitan din tingód katô langun kasalábbuan na palumun katô Áglangngagán kandin.

²⁹ Purisu igsadun si Moises asta si Aaron tun ta Ehipto, asta iga paglimud dan tô langun ágpangulun ka mga rubbad i Israel. ³⁰ Igulit si Aaron kandan tingód katô langun na igkagi katô Áglangngagán ki Moises, asta igimu dink tô langun kasalábbuan tun ta tubang dan. ³¹ Igbánnal dan na si Moises asta si Aaron tô iga pid katô Áglangngagán. Tô ikasóddór dan na inéduwan tô Áglangngagán katô mga rubbad i Israel, asta igkita tô Áglangngagán katô kahirapan dan, igunduk asta igpangadap dan.

5

Igtubang si Moises asta si Aaron katô hari ka Ehipto

k **4:30** 4:30 Tun ta kinagiyán ka Hebreo, “igimu din.” Ándà kasóddóri ka si Moises ó si Aaron tô igimu.

¹ Na, pángnga igpalimudé, igsadun si Moises asta si Aaron tun ta harì ka Ehipto, asta igkagi sikan-dan, na mà dan, “Ni gó tō kagi katô Áglangngagán na Manama na ágpangadapán katô mga rubbad i Israel: Péwà nud tō mga sakup ku ébô madun dan tun ta disyerto, su kailangan palimudé dan ébô pabantugánnna ikandan.”

² Asal igtaba tō harì, na mà din, “Sadan ni Áglangngagán? Manan ka kailangan bánnalán ku sikandin asta manan ka péwaán ku tō mga rubbad i Israel? Ándà a gó kilala kandin, asta dì ku gó péwaán tō mga rubbad i Israel.”

³ Na, igtaba si Moises asta si Aaron, na mà dan, “Igpakita áknami tō Manama na ágpangadapán katô mga Hebreo. Pasadun ké tun ta disyerto na ágkadunggù ka tállu álló ágpanón ébô mággé ké katô kailangan bággén tun ta Áglangngagán na Manama dé. Atin ka dì dé ni lumun, matayan ké ikandin ukit ka bógók ó gira.”

⁴ Igtaba tō harì, na mà din, “Yakó ágbaring katô mga manubù tun ta áglumun dan! Palónód yu tō langun állang tun ta mga áglumun dan!

⁵ Igmarapung dán gó ni mga manubù kannun ta Ehipto, asta pasódóán yu págdikandan ébô dì dan lumumu!”

⁶ Tô álló tō, igsugù katô harì tō mga ágsuguánnán din na taga Ehipto asta tō mga amo na mga rubbad i Israel, na mà din, ⁷ “Yakó ágbággé katô ragami tun ta mga manubù na ágbalát katô libutà asta ragami ébô duwán ágkagamit para gimun balé. Sikandan tō pakangén yu katô ragami. ⁸ Asal kailangan ma-

gunawa gó tô karapungan ka mga tisa¹ na gimun dan. Yakó yu ákulangi. Tukukán gó sikandan. Purisu ágrangin dan na péwaán ku sikandan ébô madun dan tun ta disyerto asta mággé dan tun ta manama dan. ⁹ Dugangi yu pa baling tô kailangan lumun dan ébô tuu dan ágkasasó tingód katô mga áglumun dan, asta dì dan dán maminág katô mga bulaló.”

¹⁰ Purisu igpanó tô mga ágsuguánnán din asta tô mga amo, asta igkagi sikandan katô mga rubbad i Israel, na mà dan, “Igsugù tô hari na dì kód bággayan ka ragami. ¹¹ Sikiyu dán tô mangé katô ragami agad ánda, asal kailangan imun yu tô karapungan ka mga tisa na magunawa katô igimu yu tô iglabé.”

¹² Purisu tô langun rubbad i Israel, igpanalap dan ka ragami tun ta kaluwagan ka banuwa ka Ehipto. ¹³ Inalayun dan ágpiritán katô mga amo dan. Igkagi tô mga amo dan, na mà dan, “Imu yu tô karapungan ka mga tisa kada álló na magunawa katô igimu yu tô iglabé.”

¹⁴ Marag áglagpássán katô mga ágsuguánnán katô hari tô mga amo na rubbad i Israel. Ginsà dan, na mà dan, “Manan ka ándà kó ikému katô karapungan ka mga tisa ni álló ni na magunawa katô igimu yu tô iglabé?”

¹⁵ Na, tô mga amo na rubbad i Israel igsadun tun ta hari, asta iga-pédu-édu dan, na mà dan, “Sir, yaka ágahirap áknamí! ¹⁶ Ándà dán ragami na ágbággén áknamí, asal ágpémun ké pô gó katô karapungan ka mga tisa na magunawa katô igimu dé tô iglabé.

¹ **5:8** 5:8 Tisa tô iring na hollow block para gimun balé.

Agad ándà salà dé, áglagpássán ké pô gó! Asal tô salà tun ta mga sakup nu.”

¹⁷ Asal igtaba tô harì, na mà din, “Tukukán kó gó! Ánnà kó malóggód áglumu! Purisu igpédu-édu kó na péwaán ku sikiyu ébô mággé kó tun ta Áglangngagán yu. ¹⁸ Lónód kó tun ta áglumun yu! Ándà ragami na bággén ákniyu, asal kailangan mimu kó katô karapungan ka mga tisa na magunawa katô igimu yu tô iglabé.”

¹⁹ Igkita tô mga amo ka mga rubbad i Israel na ándà gó mému dan ébô méwà tô kahirapan dan, su igsugù tô harì kandan na kailangan magunawa tô karapungan ka mga tisa na imun dan kada álló. ²⁰ Tô igtananan dan tô harì, igsumar dan si Moises asta si Aaron na gangat kandan, ²¹ asta igkagiyan dan, na mà dan, “Mólà pa ka kitanán pád katô Áglangngagán tô iglumu yu, asta supakan kó ikandin, su ukit ákniyu, miringasa tô harì asta tô mga opisyales din áknami. Igbággé yu kandan tô gunayan ébô matayan ké ikandan.”

²² Purisu igdasal dán puman si Moises tun ta Áglangngagán. Igkagi sikandin, na mà din, “Áglangngagán, manan ka igpadunggù nu ni kahirapan tun ta mga sakup nu? Manan ka igpapidda ikuna? ²³ Su tikud gó katô katubang ku ka harì ébô ulitán ku tô kagi nu, igpahirapan din baling tô mga sakup nu, asta ándà palang tabang nu kandan!”

6

¹ Asal igkagi tô Áglangngagán ki Moises, na mà din, “Dì madugé, kitanán nu tô lumun ku katô harì ka Ehipto. Atin kinnaman din tô katulusan ku,

péwaán din tô mga sakup ku, asta piritán din gó sikandan ébô malaguy dan tikud tun ta banuwa din.”

Igtawar puman ka Manama si Moises

² Igkagi tô Manama ki Moises, na mà din, “Sakán tô Áglangngagán. ³ Igpakita a ki Abraham, ki Isaac, asta ki Jacob. Igpasóddór ku kandan na sakán tô Tuu Matulus Manama, asal ándà ku pasóddóri kandan tô ngadan ku na YAHWEH.m ⁴ Igimu ku pagsik tô kasabotan tun kandan, su bággén ku kandan tô banuwa ka Canaan na igóoddóan dan sayyan iring na mga bisita. ⁵ Igdinág ku tô mga arangán katô mga rubbad i Israel na igállang katô mga taga Ehipto, asta isampáttan ku tô kasabotan ku tun kandan. ⁶ Purisu úlit nu ni kagi ku tun ta mga rubbad i Israel, ‘Sakán tô Áglangngagán. Péwaán ku sikiyu tikud tun ta kallang ákniyu tun ta Ehipto. Ukit katô katulusan ku padungguan ku sikandan katô supak na makamáddang, asta tábbusán ku sikiyu. ⁷ Imun ku sikiyu na kanak mga manubù, asta mémuwa na Manama yu. Atin ka paluwaán ku sikiyu tikud tun ta kallang ákniyu tun ta Ehipto, kasóddóran yu na sakán tô Áglangngagán na Manama yu. ⁸ Piddán ku sikiyu tun ta banuwa na igtandô ku ki Abraham, ki Isaac, asta ki Jacob! Bággén ku ni banuwa ákniyu ébô matigatun yu. Sakán tô Áglangngagán.’ ”

⁹ Agad igulit ni i Moises tun ta mga rubbad i Israel, asal ándà dan paminág kandin, su inan-

m **6:3** 6:3 Tingód katô ngadan YAHWEH, ahaán tô Exodo 3:2.

daan dan dán ka gimanan tingód katô kahirapan ka kallang kandan.

¹⁰ Na, igkagi tô Áglangngagán ki Moises, na mà din, ¹¹ “Lónód ka tun ta harì ka Ehipto, asta kagiyi nu sikandin na kailangan péwaán din tô mga rubbad i Israel tikud tun ta banuwa din.”

¹² Asal igtaba si Moises, na mà din, “Atin ka dì maminág kanak tô mga rubbad i Israel, sobra pa na dì maminág tô harì, su diya tuu pakabolós ágkagi.”

¹³ Asal igsugù katô Áglangngagán si Moises asta si Aaron, na mà din, “Uliti yu tô mga rubbad i Israel asta tô harì na sikiyu tô igsugù ku ébô mid katô mga rubbad i Israel tikud tun ta Ehipto.”

Mga kamónaan i Moises asta i Aaron

¹⁴ Ni gó tô mga kamónaan i Moises asta i Aaron. Si Ruben tô tambang kaké batà i Jacob. Duwán áppat gabatà din gamama, na si Hanoc, si Palu, si Hesron, asta si Carmi. Tô gó tô mga rubbad i Ruben. ¹⁵ Si Simeon duwán ánnám gabatà din gamama, na si Jemuel, si Jamin, si Ohad, si Jaquin, si Sohar, asta si Saul na batà katô bayi na Canaanhon. Tô gó tô mga rubbad i Simeon. ¹⁶ Si Levi duwán tallu gabatà din gamama, na si Gerson, si Cohat, asta si Merari. Igdunggù ka sábbad gatus tallu pulù pittu (137) tô idad i Levi. ¹⁷ Si Gerson duwán duwa gabatà din gamama, na si Libni asta si Simei. Marapung tô mga rubbad dan. ¹⁸ Si Cohat duwán áppat gabatà din gamama, na si Amram, si Isar, si Hebron, asta si Uziel. Igdunggù ka sábbad gatus tallu pulù tallu (133) tô idad i Cohat. ¹⁹ Si

Merari duwán duwa gabatà din gamama, na si Mali asta si Musi. Tô gó tò mga rubbad i Levi.

²⁰ Igkalyagan i Amram si Jocabed na tábbé katô ámmà din, asta igbatà si Jocabed ki Aaron asta ki Moises. Igdunggù ka sábbad gatus tállu pulù pittu (137) tò idad i Amram. ²¹ Si Isar duwán tállu gabatà din gamama, na si Core, si Nefeg, asta si Secri. ²² Si Usiel duwán tállu gabatà din gamama, na si Misael, si Elsafan, asta si Setri. ²³ Igkalyagan i Aaron si Eliseba na batà i Aminadab asta tábbé i Nason. Igbatà sikandin ki Nadab, ki Abihu, ki Eleasar, asta ki Itamar. ²⁴ Si Core duwán tállu gabatà din gamama, na si Aser, si Elcanas, asta si Abiasaf. Tô gó tò mga rubbad i Core. ²⁵ Si Eleasar tò batà mama i Aaron. Igkalyagan din tò sábbad batà i Futiel, asta igbatà sikandin ki Pinehas. Ni gó tò mga kamónaan katô mga rubbad i Levi, asta mga pamilya dan. ²⁶ Iglista tò ngadan i Moises asta i Aaron apil katô duma mga rubbad i Jacob. Sikandan tò igkagiyan katô Áglangngagán, na mà din, “Sikiyu tò mid katô mga rubbad i Israel tikud tun ta Ehipto.”

²⁷ Si Moises asta si Aaron tò igkagi tun ta harì ébô péwaán din tò mga rubbad i Israel tikud tun ta Ehipto.

Igsugù puman katô Áglangngagán si Moises asta si Aaron

²⁸ Na, tò igtóngkô tò Áglangngagán ki Moises tun ta Ehipto, ²⁹ igkagi sikandin, na mà din, “Sakán tò Áglangngagán! Kagiyi nu tò harì ka Ehipto katô igkagi ku áknikó.”

³⁰ Asal igtaba si Moises, na mà din, “Su diya tuu pakabólós ágkagi, manan ka maminág tō harì kanak?”

7

¹ Igkagi tō Áglangngagán ki Moises, na mà din, “Imun ku sikuna iring na Manama tun ta tubang katô harì ka Ehipto, asta imun ku tō kataladi nu si Aaron iring na propeta nu na kumagi tun ta harì. ² Kagiyi nu si Aaron katô langun na ágsuguán ku áknikó. Sikandin tō sumugù katô harì na kailangan péwaán din tō mga rubbad i Israel tikud tun ta banuwa din. ³ Asal patággasán ku tō ulu ka harì. Agad imun ku tō marapung mga kasalábbuan tun ta Ehipto, ⁴ asal dì sikandin maminág áknikó. Purisu ukit katô katulusan ku, supakan ku tō mga taga Ehipto ukit ka marapung mga supak, asta sakán tō mid katô langun sakup ku tikud tun ta Ehipto. ⁵ Atin ka pakitanán ku tō katulusan ku tun ta mga taga Ehipto, asta piddán ku tō mga rubbad i Israel tikud tun ta banuwa dan, kasóddóran dan na sakán tō Áglangngagán.”

⁶ Purisu igbánnal si Moises asta si Aaron katô igsugù ka Áglangngagán kandan. ⁷ Tō igtubang si Moises asta si Aaron katô harì ka Ehipto, kawaluwan (80) tō idad i Moises, asta kawaluwan tallu (83) tō idad i Aaron.

Tō tukád i Aaron

⁸ Na, igkagi tō Áglangngagán ki Moises asta ki Aaron, na mà din, ⁹ “Kumagi tō harì ka Ehipto ákniyu na kailangan duwán kasalábbuan na imun yu ébô kasóddóran din na igapid kó ka Manama.

Purisu kagiyi nu si Aaron na dabuán din tō tukád din tun ta tanà na tubang katô harì ébô mému na áppuy."

¹⁰ Na, igsadun si Moises asta si Aaron tun ta harì, asta igimu dan tō kasalábbuan na igsugù katô Áglangngagán kandan. Igdabù i Aaron tō tukád din tun ta tanà na tubang katô harì asta mga opisyales din, asta inému na áppuy. ¹¹ Na, igpatawar katô harì tō mapandé mga sakup din asta tō mga tarasalamangka, asta ukit katô mga salamangka dan igimu dan pagsik tō kasalábbuan na igimu i Aaron. ¹² Igdabù dan tō kandan mga tukád tun ta tanà, asta inému na mga áppuy. Asal iglámmád katô tukád i Aaron tō kandan mga tukád. ¹³ Asal igmatággas tō ulu ka harì, asta igéllé sikandin na maminág ki Moises asta ki Aaron, magunawa katô taganà igkagi katô Áglangngagán kandan.

*Igdunggù tō mga kadattan tun ta Ehipto
Exo 7:14-12:36*

Tō dipanug

¹⁴ Na, igkagi tō Áglangngagán ki Moises, na mà din, "Tuu matággas tō ulu ka harì, asta dì din péwaán tō mga manubù. ¹⁵ Purisu simag ka sállám, atin ka madun tō harì tun ta Wayig ka Nilo, saduni nu sikandin. Pid nu tō tukád nu na inému áppuy, asta angati nu sikandin tun ta ligad katô wayig.

¹⁶ Kagiyi nu sikandin, 'Tō Áglangngagán na Manama na ágpangadapán katô mga Hebreo tō igpapid kanak dini áknikó ébô kagin ku áknikó na kailangan péwaán nu tō mga sakup din ébô mangadap dan kandin tun ta disyerto. Sippang áknganni

igéllé ka asta ándà ka paminág kandin. ¹⁷ Na, igkagi katô Áglangngagán na duwán gó lumun din ébô kasóddóran nu na sikandin gó tô Áglangngagán. Gamitán ku ni tukád ku asta lagpássán ku ni Wayig ka Nilo ébô mému na dipanug. ¹⁸ Maté tô mga sáddà, asta kumawù ni wayig. Dì dán makénám tô mga taga Ehipto katô wayig tikud tun ta Nilo.’ ”

¹⁹ Na igkagi tô Áglangngagán ki Moises, na mà din, “Kagiyi nu si Aaron ébô tádduán din ka tukád tô langun wayig na garus tun ta Ehipto, agad tô tun ta mga kanal, tô tun ta mga basakán, asta tô tun ta mga lino. Mému dipanug tô wayig tun ta kaluwagan ka Ehipto, agad tô tun ta mga ágtaguanan na igimu ka kayu ó igimu ka batu.”

²⁰ Purisu igbánnal si Moises asta si Aaron katô igsugù ka Áglangngagán kandan. Tun ta tubang katô harì asta mga opisyales din, igtáddù i Aaron tô tukád din, asta iglagpás din tô wayig. Inému na dipanug tô Wayig ka Nilo. ²¹ Inaté tô mga sáddà, asta igmawù tô wayig. Dì dán makénám tô mga taga Ehipto katô wayig. Inému tô wayig na dipanug tun ta kaluwagan ka Ehipto. ²² Magunawa tô igimu katô mga tarasalamangka na taga Ehipto ukit katô kakatigan dan. Purisu matággas gó tô ulu ka harì. Ándà sikandin paminág ki Moises asta ki Aaron, magunawa katô taganà igkagi katô Áglangngagán. ²³ Iguli tô harì tun ta balé din, asta ándà din panámdámmi tô ilumu. ²⁴ Igkali tô langun taga Ehipto tun ta ligad katô wayig ébô makakangé dan ka wayig na ginámmán, su dì gó ágkénám tô Wayig ka Nilo.

25 Iglabé tō pittu álló pángnga igimu ka Áglangngagán tō Wayig ka Nilo na dipanug.

8

Tô mga bakbak

1 Na, igkagi tō Áglangngagán ki Moises, na mà din, “Sadun ka tun ta harì ka Ehipto, asta kagiyi nu sikandin, ‘Ni gó tō igkagi katô Áglangngagán: Péwà nu tō mga sakup ku ébô mangadap dan kanak. **2** Asal ka méllé ka asta dì nu sikandan péwaán, ipánnuán ku gó tō kaluwagan ka Ehipto ka marapung mga bakbak. **3** Mapánnù tō Wayig ka Nilo ka mga bakbak. Mahu tun ta balé nu, tun ta kuwarto nu, asta tun ta katri nu. Mahu tō mga bakbak tun ta mga balé katô mga opisyales nu, asta mga sakup nu. Mahu gó tō mga bakbak agad tun ta abu nu, asta tun ta ágmasaan nu ka pan. **4** Láttuwan ka gó asta tō mga sakup nu, asta tō mga opisyales nu.””

5 Igkagi tō Áglangngagán ki Moises, na mà din, “Kagiyi nu si Aaron na tádduán din ka tukád din tō mga wayig, tō mga kanal, asta tō mga ranó ébô lumuwà tō mga bakbak asta tumalap tun ta kaluwagan ka Ehipto!”

6 Purisu igbánnal si Aaron ki Moises, asta igluwà tō mga bakbak tikud tun ta wayig, asta igtalap tun ta kaluwagan ka Ehipto. **7** Magunawa tō igimu katô mga tarasalamangka taga Ehipto ukit katô kakatigan dan, su igaipaluwà dan tō mga bakbak tikud tun ta wayig.

8 Na, igaipatawar katô harì si Moises asta si Aaron, asta igkagiyan din, na mà din, “Dasal kó

tun ta Áglangngagán ébô iwaán din tô mga bakbak tikud kanak asta tikud tun ta mga sakup ku. Péwaán ku gó tô langun yu ébô mangadap kó katô Áglangngagán.”

⁹ Igtaba si Moises, na mà din, “Kagi ka dád ka kadángngan tô kadasal ku para áknikó, tô mga opisyales nu, asta tô mga sakup nu ébô méwà ni mga bakbak tikud tun ákniyu asta tun ta mga balé yu. Masamà dád tô mga bakbak na tun ta Wayig ka Nilo.”

¹⁰ Igtaba tô harì, na mà din, “Dasal ka para kanak simag.”

Igkagi si Moises, na mà din, “Matuman tô kakalyag nu ébô kasóddóran nu na ándà ássa manama na duwán katulusan ka tandingán katô Áglangngagán na Manama dé. ¹¹ Méwà tô mga bakbak tun ákniyu, tun ta mga balé yu, tun ta mga opisyales nu asta tun ta mga sakup nu. Masamà dád tô mga bakbak na tun ta Wayig ka Nilo.”

¹² Tô igluwà dán si Moises asta si Aaron tikud tun ta balé katô harì, igdasal si Moises tun ta Áglangngagán tingód katô mga bakbak na igapid din. ¹³ Igtuman katô Áglangngagán tô igaipamuyù i Moises, asta inaté tô mga bakbak tun dalám ta mga balé, tun ta luwà ka mga balé, asta tun ta mga kinamát. ¹⁴ Iglimud katô taga Ehipto tô inaté mga bakbak tun ta magdakál mga kalimud, asta igmawù tô tibuk Ehipto. ¹⁵ Asal tô igkita katô harì na inaté dán tô mga bakbak, igaipatággas din tô ulu din, asta ándà paminág ki Moises asta ki Aaron, magunawa katô taganà igkagi katô Áglangngagán.

Tô mga tagánnák

¹⁶ Na, igkagi tô Áglangngagán ki Moises, na mà din, “Kagiyi nu si Aaron na lagpássán din tô tanà ka tukád din ébô tô barukbuk mému na tagánnák tun ta kaluwagan ka Ehipto.”

¹⁷ Igbánnal dan katô igsugù katô Áglangngagán kandan. Tô iglagpás i Aaron tô tukád din tun ta tanà, ipánnù ka tagánnák tô mga taga Ehipto asta tô mga mannanap dan, su tô langun ka barukbuk tun ta Ehipto inému na mga tagánnák. ¹⁸ Igkinnam tô mga tarasalamangka na igimu ka mga tagánnák ukit katô mga kakatigan dan, asal ándà dan ikému. Ipánnù ka tagánnák tô mga manubù asta tô mga mannanap dan. ¹⁹ Igkagi tô mga tarasalamangka katô harì, na mà dan, “Manama tô igimu kani kasalábbuan.”

Asal igmatággas gó ô ulu ka harì, asta ándà paminág ki Moises asta ki Aaron, magunawa katô taganà igkagi katô Áglangngagán.

Tô mga langó

²⁰ Na, igkagi tô Áglangngagán ki Moises, na mà din, “Simag ka tuu sállám, atin ka madun tô harì tun ta wayig, angati nu sikandin, asta kagiyi nu, ‘Ni gó ô igkagi katô Áglangngagán: Péwà nu ôtô mga sakup ku ébô mangadap dan kanak. ²¹ Atin ka méllé ka, papiddán ku ô marapung mga langó tun áknikó, tun ta mga opisyales nu, asta tun ta mga sakup nu. Mapánnù ka mga langó ôtô mga balé yu asta ôtô kaluwagan kani tanà. ²² Asal ássa ôtô lumun ku para katô mga rubbad i Israel, su ándà langó na papiddán ku tun ta Gosen na góddóan

katô mga sakup ku, ébô makasóddór ka na sakán tô Áglangngagán agad kannun ta Ehipto. ²³ Ássan ku tô kanak mga sakup asta tô áknikó mga sakup. Mému ni na kasalábbuan simag.’”

²⁴ Igimu ni katô Áglangngagán, asta igahu tô marapung mga langó tun ta balé katô harì, tun ta langun balé katô mga opisyales din, asta tun ta langun balé tun ta Ehipto. Idattan tô langun tun ta Ehipto tingód katô mga langó.

²⁵ Na, igañawat katô harì si Moises asta si Aaron, asta igkagiyan din, na mà din, “Panó kód gó. Bággé yu tô mga mannanap tun ta Manama yu kannun ta Ehipto.”

²⁶ Igtaba si Moises, na mà din, “Dì mému ni, su miringasa tô mga taga Ehipto áknami ukit katô kabággé dé ka mga mannanap tun ta Áglangngagán na Manama dé. Purisu atin ka makakita dan katô kabággé dé, timbagán ké gó ikandan ka batu ébô maté ké. ²⁷ Kailangan madun ké tun ta disyerto na ágkadunggù ka tállu álló ágpanón ébô mággé ké katô kailangan bággén tun ta Áglangngagán na Manama dé, magunawa katô igsugú din áknami.”

²⁸ Purisu igkagi tô harì, na mà din, “Atin ka dì kó madun tun ta madiyù, péwaán ku sikiyu ébô madun kó tun ta disyerto asta mággé kó katô kailangan bággén yu tun ta Áglangngagán na Manama yu. Asal dasal kó tun kandin para kanak.”

²⁹ Igkagi si Moises, na mà din, “Manówad, asta dumasalla tun ta Áglangngagán ébô simag andaán din tô langó tun áknikó, tun ta mga opisyales nu, asta tun ta mga taga Ehipto. Asal yakó áglimbung puman áknami. Yaka nu ágbaringi tô mga rubbad i

Israel, su kailangan mággé ké tun ta Áglangngagán dé.”

³⁰ Igpanó si Moises asta igdasal sikandin tun ta Áglangngagán. ³¹ Igtuman katô Áglangngagán tô igpamuyù i Moises, asta inewà tô langun langó. Ándà palang langó na isamà. ³² Asal igpatággas puman tô harì ka ulu din, asta ándà din péwai tô mga rubbad i Israel.

9

Inaté tô mga mannanap

¹ Na, igkagi tô Áglangngagán ki Moises, na mà din, “Saduni nu tô harì ka Ehipto, asta kagiyi nu sikandin, ‘Ni gó tô igkagi katô Áglangngagán na Manama na ágpangadapán katô mga Hebreo: Péwà nu tô mga sakup ku ébô mangadap dan kanak.

² Atin ka méllé ka pa, asta dì nu puman péwaán,

³ supakan ku sikuna ukit katô makamáddang bógók na dumunggù tun ta mga mannanap yu, tun ta mga kudà, mga asno, mga kamelyo, mga baka, mga karnero, asta mga kambing yu. ⁴ Asal ássan ku puman tô mga mannanap katô mga rubbad i Israel, su ándà palang mannanap dan na maté.’

⁵ Na, igsalin katô Áglangngagán tô álló ébô tumanán din ni, su igkagi sikandin na imun din ni simag.”

⁶ Pagkasimag, igtuman katô Áglangngagán tô igkagi din, asta inaté tô langun mannanap ka mga taga Ehipto, asal tun ta mga mannanap katô mga rubbad i Israel, ándà palang inaté. ⁷ Duwán mga manubù na igsugù katô harì ébô kasóddóran din ka imánnu tô mga mannanap katô mga rubbad i Israel, asta igulitan dan sikandin na ándà gó

palang inaté. Asal igmatággas gó puman tō ulu ka harì, asta ándà din gó péwai.

Tô mga pigsa

⁸ Na, igkagi tō Áglangngagán ki Moises asta ki Aaron, na mà din, “Kangé kó ka abu tikud tun ta ággóbbówanan. Tô gó é sabudán i Moises tun ta karamag na tubang katô harì. ⁹ Matalap ni iring na barukbuk tun ta kaluwagan ka Ehipto, asta pigsan tō mga manubù asta tō mga mannanap dan tingód katô barukbuk, asta mému ni na mga bakukang.”

¹⁰ Purisu igkangé dan tō abu tun ta ággóbbówanan, asta igtubang dan tō harì. Igsabud i Moises tun ta karamag, asta iga pigsa tō mga taga Ehipto asta tō mga mannanap dan, asta inému na mga bakukang. ¹¹ Ándà ikatubang tō mga tarasalamangka ki Moises, su iga pigsa dan, magunawa katô duma mga taga Ehipto. ¹² Asal igpatággas gó katô Áglangngagán tō ulu ka harì, asta ándà din pamináaggi si Moises asta si Aaron, magunawa katô taganà igkagi ka Áglangngagán.

Igpadabù tō magdakál mga ayis tun ta banuwa

¹³ Na, igkagi tō Áglangngagán ki Moises, na mà din, “Simag ka tuu sállám, saduni nu tō harì, asta kagiyi nu sikandin, ‘Ni gó tō igkagi katô Áglangngagán na Manama na ágpangadapán katô mga Hebreo: Péwà nu tō mga sakup ku ébô mangadap dan kanak. ¹⁴ Atin méllé ka pa, papiddán ku tō mga supak tun áknikó, tun ta mga opisyales nu, asta tun ta mga sakup nu ébô kasóoddóran nu na ándà ássa na magunawa kanak tun ta tibuk

kani banuwa. ¹⁵ Atin ka ándà pa kédu ku ákniyu, igmatayan kud pád sikiyu langun. Mému ka papíddan ku sikiyu ka bógók ébô maté kó langun. ¹⁶ Asal ándà ku sikiyu matayi ébô kitanán yu tō katulusan ku, asta ébô pabantugánnna ikiyu tun ta kaluwagan ka banuwa. ¹⁷ Asal ágpahirap ka pa katô mga sakup ku, asta ándà ka pa péwà kandan. ¹⁸ Purisu simag ka iring kani oras ni, padabuán ku tō magdakál mga ayis iring na mabággat mga batu. Ándà pa idabù iring kani tikud na duwán dán mga manubù na góddô tun ta Ehipto sippang áknganni. ¹⁹ Purisu sugù ka na kailangan pallungán tō langun mannanap asta tō mga taralumu tun ta kinamát, su madabù tō magdakál mga ayis iring na mabággat mga batu, asta maté gó tō mga manubù asta tō mga mannanap na itananan tun ta luwà ka balé.’”

²⁰ Duwán mga opisyales na ighbánnal katô igkagi ka Áglangngagán, asta igapasékót dan igaallung tō mga állang dan asta tō mga mannanap tun ta balé. ²¹ Asal tō duma mga opisyales na ándà bánnal katô igkagi ka Áglangngagán, itananan dan tō mga állang dan asta tō mga mannanap dan tun ta luwà ka balé.

²² Na, igkagi tō Áglangngagán ki Moises, na mà din, “Tayó nu tō bállad nu tun ta langit ébô madabù tō magdakál mga ayis tun ta kaluwagan ka Ehipto, agad tun ta mga manubù, tun ta mga mannanap, asta tun ta mga pamulanán tun ta kinamát.”

²³ Purisu igtayó i Moises tō tukád din tun ta langit, asta igapakilat katô Áglangngagán, igaadabù din tō magdakál mga ayis, asta igkirám tun ta banuwa. Igpadabù katô Áglangngagán tō magdakál mga ayis

iring na mabággat mga batu tun ta kaluwagan ka Ehipto. ²⁴ Tuu mabákkár tō kadabù ka mga ayis, asta marag igkirám. Ándà gó palang inému iring kani tikud na duwán dán mga manubù na góddô tun ta Ehipto. ²⁵ Tun ta kaluwagan ka Ehipto, isugatan ka mga ayis tō langun na ándà pallungi, agad tō mga manubù asta tō mga mannanap dan. Idattan gó puman tō langun pamulanán asta mga kayu. ²⁶ Tō banuwa ka Gosen na góddóan katô mga rubbad i Israel, tō dát gó tō lugar na ándà kadabui ka mga ayis.

²⁷ Na, igpatawar katô harì si Moises asta si Aaron, asta igkagiyan din, na mà din, “Ikasalà a. Nángngà tō iglumu katô Áglangngagán. Ánnà nángngà tō iglumu ku asta katô mga sakup ku, su ándà ké péwà katô mga rubbad i Israel. ²⁸ Dasal kó tun ta Áglangngagán su dì ké pakatiis kani madat kilat asta ágkadabù na mga ayis. Péwaán kud gó sikiyu. Dì kéd lumiput ákniyu.”

²⁹ Igkagi si Moises kandin, na mà din, “Atin ka panówad tikud tun ta lunsud, tayón ku tō bállad ku asta dumasalla tun ta Áglangngagán. Sumódô tō kilat asta tō mga ayis ágkadabù. Purisu kasóddoran nu na Áglangngagán tō tigatun kani tibuk banuwa. ³⁰ Asal ikasóddórra na sikuna asta tō mga opisyales nu, ándà pô gó máddang yu katô Áglangngagán na Manama.”

³¹ Idattan tō sebada asta tō mga pamula na ágkangayan katô duru, su tō sebada malutù dán, asta ágbulak dán tō pamula na ágkangayan katô iring na duru. ³² Asal ándà kadatti tō trigo, su ándà pa tubù.

³³ Na, igtananan i Moises tō harì, asta igpanó sikandin tikud tun ta lunsud. Tō igtayó si Moises katô bállad din asta igdasal sikandin tun ta Áglangngagán, igsódô tō kilat asta tō kadabù ka mga ayis. ³⁴ Tō igkita tō harì na igsódô dán tō udan, tō kadabù ka mga ayis, asta tō kirám, ikasalà dán puman sikandin asta tō mga opisyales din, ³⁵ su igpatággas din puman tō ulu din, asta ándà din péwai tō mga rubbad i Israel, magunawa katô taganà igkagi katô Áglangngagán ukit ki Moises.

10

Tō mga apang

¹ Na, igkagi tō Áglangngagán ki Moises, na mà din, “Saduni nu tō hari ka Ehipto. Igpatággas ku tō ulu din asta tō ulu ka mga opisyales din ébô pakitanán ku tō katulusan ku kandan ukit kani mga kasalábbuan. ² Atin ka matugál kód, kólitan yu tō mga gabatà yu asta tō mga apù yu tingód katô mga kasalábbuan na gimun ku ukit ka supak ku katô mga taga Ehipto ébô makasóddór kó langun na sakán gó tō Áglangngagán.”

³ Purisu igsadun si Moises asta si Aaron tun ta harì, asta igkagi sikandan kandin, na mà dan, “Ni gó tō igkagi katô Áglangngagán na Manama na ágpangadapán katô mga Hebreo: Manan ka ágpanayun ka géllé na pabbabà kanak? Péwà nud tō mga sakup ku ébô mangadap dan kanak! ⁴ Atin ka manayun ka méllé, banté ka gó, su simag papiddán ku tō mga apang tun ta banuwa nu. ⁵ Tingód katô karapungan dan, katambunan

tô bówwó ka tanà ébô dì yu gó kitanán tô tanà. Kannán dan tô langun na ándà kadatti katô kadabù ka mga ayis. Kannán dan tô langun kayu yu. ⁶ Mapánnù tun ta mga balé nu na dakál é lagà, tun ta mga balé katô mga opisyales nu, asta tun ta mga balé katô langun sakup nu. Ándà gó palang kadattan iring kani tikud na duwán dán mga manubù na góddô tun ta Ehipto.”

Na, igtananan i Moises tô hari.

⁷ Igkagi tô mga opisyales katô hari, na mà dan, “Manan ka ágpabayaán nu ni manubù na ágsamuk áknita? Péwà nud tô mga gamama ébô mangadap dan katô Áglangngagán na Manama dan! Ándà nu pa kasóddóri na idattan dán tô banuwa ka Ehipto?”

⁸ Purisu igpalónód katô hari si Moises asta si Aaron, asta igkagiyan din, na mà din, “Mému dán ka panó kód ébô mangadap kó katô Áglangngagán na Manama yu. Asal sadan tô manó?”

⁹ Igtaba si Moises, na mà din, “Manó ké langun, agad tô mga gabatà dé asta tô mga tugál. Piddán dé tô mga karnero dé, tô mga kambing dé, asta tô mga baka dé, su palimudé ké ébô pabantugán dé tô Áglangngagán.”

¹⁰ Igkagi tô hari, na mà din, “Atin ka piddán yu tô langun pamilya yu, kailangan tabangan kó katô Áglangngagán tingód katô lumun ku ákniyu, su dì mému piddán yu sikandan. Tuu dán matayyó na madat gó tô plano yu. ¹¹ Dì mému kanak! Mga gamama dát ô makapanó ébô mangadap katô Áglangngagán, su tô gó é kakalyag yu.”

Na, igréwà dan tikud tun ta tubang katô hari.

¹² Na, igkagi tō Áglangngagán ki Moises, na mà din, “Tayó nu tō bállad nu ébô dumunggù tō mga apang tun ta banuwa ka Ehipto. Matalap dan tō kaluwagan ka Ehipto, asta kannán tō langun pamulanán na ándà kadatti katô mga ayis.”

¹³ Purisu igtayó i Moises tō tukád din, asta igpapid katô Áglangngagán tō mabákkár karamag tikud tun ta silatan ka Ehipto igladé ka álló asta dukilám. Tō igsállám dán, duwán mga apang na igrpid katô karamag. ¹⁴ Tuu marapung tō mga apang, asta igsunnad tun ta kaluwagan ka Ehipto. Ándà palang apang na ikadunggù iring kani tikud na duwán dán mga manubù na góddô tun ta Ehipto, asta ándà dán palang dumunggù iring kani. ¹⁵ Itambunan katô mga apang tō bówwó ka tanà tun ta kaluwagan ka Ehipto sippang igmétám tō tanà. Igkan dan tō langun pamulanán asta tō mga buuy ka kayu na ándà kadatti ukit ka kadabù ka mga ayis. Ándà gó palang malunnó daun na isamà tun ta kaluwagan ka Ehipto.

¹⁶ Na, sékót igpatawar katô harì si Moises asta si Aaron, asta igkagiyán din, na mà din, “Bánnal na ikasalà a tun ta Áglangngagán na Manama yu asta tun ákniyu. ¹⁷ Pasinsiyayiya kani salà na ilumu ku nigó, asta dasal kó tun ta Áglangngagán na Manama yu ébô iwaán din ni tuu madat supak.”

¹⁸ Purisu igtananan i Moises tō harì, asta igdasal sikandin tun ta Áglangngagán. ¹⁹ Purisu igpapid katô Áglangngagán tō mabákkár karamag na tikud tun ta salláppan, asta ipid tō mga apang tun ta

Dagat na Mallutù.ⁿ Ándà gó palang apang na isamà, agad sábbad, tun ta kaluwagan ka Ehipto. **20** Asal igpatággas puman katô Áglangngagán tô ulu ka harì, asta ándà din péwai tô mga rubbad i Israel.

Tô kangittángngan

21 Na, igkagi tô Áglangngagán ki Moises, na mà din, “Tayó nu tô bállad nu tun ta langit ébô dumunggù tô kangittángngan tun ta kaluwagan ka Ehipto. Tuu kumangittáng asta makamáddang.”

22 Purisu igtayó i Moises tô bállad din tun ta langit, asta igdunggù tô tuu kangittángngan tun ta kaluwagan ka Ehipto sippang tun ta ikatállu álló.

23 Ándà pakitaé tô mga taga Ehipto, asta ándà dan luwà tikud tun ta mga balé dan dalám ka tállu álló. Asal mappawà tô tun ta góddóan katô mga rubbad i Israel.

24 Igpatawar katô harì si Moises, asta igkagiyán din, na mà din, “Makapanó kód langun ébô mangadap kó katô Áglangngagán. Mému ka mákkás dán ákniyu tô mga gabayi asta tô mga gabatà yu. Asal tô dát mga karnero, tô mga kambing, asta tô mga baka tô tananan yu dini.”

25 Asal igtaba si Moises, na mà din, “Dì mému! Kailangan piddán dé pagsik tô mga mannanap na matayan asta góbbón ébô bággén dé tun ta Áglangngagán na Manama dé. **26** Kailangan piddán dé tô langun mannanap dé. Dì mému ka duwán tananan, agad sábbad, ébô makasalin ké katô matayan dé asta bággén dé tun ta Áglangngagán na Manama dé. Dì ké pa makasóddór ka ándin

ⁿ **10:19** 10:19 Dagat na Mallutù, ó Dagat katô mga Banban.

mannanapi tō matayan dé sippang ka dumunggù ké.”

²⁷ Asal igpatággas puman katô Áglangngagán tō ulu ka harì, asta ándà din péwai. ²⁸ Igkagi tō harì ki Moises, na mà din, “Iwà ka kannun ta tubang ku, asta yakad gó ágpakita puman kanak, su atin ka kitanán ku puman sikuna, pamatayan ku.”

²⁹ Igtaba si Moises, na mà din, “Matuman tō kakalyag nu! Dì kad puman kumita kanak.”

11

Inaté tō mga tambang kaké gabatà gamama

¹ Na, igkagi tō Áglangngagán ki Moises, na mà din, “Papiddán ku tō sábbad pa supak tun ta harì ka Ehipto asta tun ta mga sakup din ébô péwaán kó ikandin. Atin ka péwaán kód, pamagaan kó gó ikandin ébô makéwà kó. ²Kagiyi nu tō mga rubbad i Israel ébô pamuyuán dan tō mga salagbat, tō mga pangkis, asta tō bulawan mga arites tun ta mga simbalé dan na taga Ehipto.”

³ Igimu ka Áglangngagán na kadayawan tō mga taga Ehipto tingód katô mga rubbad i Israel. Tō mga opisyales ka harì asta tō mga taga Ehipto igrespeto ki Moises na sábbad ágkabantug manubù tun ta Ehipto.

⁴ Purisu igkagi si Moises katô harì, na mà din, “Ni gó tō igkagi ka Áglangngagán: Tángngà ka dukilám, panó-panówa tun ta kaluwagan ka Ehipto.

⁵ Maté tō langun tambang kaké gabatà gamama dini ta Ehipto, agad tō tambang kaké batà mama katô harì na sumui kandin, asta tambang kaké batà mama katô állang din na ággiling dád ka trigo.

Maté tō mga tambang kaké nati mama katō mga baka. ⁶ Tuu gó mabákkár tō darawitán katō mga manubù tun ta kaluwagan ka Ehipto. Ándà gó palang darawitán iring kani tikud na duwán dán mga manubù na góddô tun ta Ehipto, asta ándà dán palang darawitán iring kani. ⁷ Asal tumagnáp gó tō tun ta mga rubbad i Israel, su agad tō mga asu dì mábbu katō mga manubù ó mga mannanap ébô kasóddóran nu gó na ássan katō Áglangngagán tō mga rubbad i Israel tun ta mga taga Ehipto.”

⁸ Igkagi si Moises, na mà din, “Tumubang tō langun opisyales nu kanak, asta lumingkóod dan. Pédu-édu dan na miwà a, asta patákkássán ku tō mga sakup ku. Atin ka matuman dán ni, miwà ad.”

Tuu isókó si Moises, asta igtananan din tō hari.

⁹ Ituman tō igkagi katō Áglangngagán ki Moises, na mà din, “Dì maminág tō hari áknikó ébô marapung tō mga kasalábbuan na imun ku tun ta Ehipto.” ¹⁰ Agad igimu si Moises asta si Aaron kani mga kasalábbuan tun ta tubang katō hari, asal igpatággas katō Áglangngagán tō ulu din ébô dì din péwaán tikud tun ta Ehipto tō mga rubbad i Israel.

12

Tingód katō dukilám ka kalabé

¹ Na, igkagi tō Áglangngagán ki Moises asta ki Aaron dutun ta Ehipto, na mà din, ² “Imun ni bulan ni na tagnà bulan ka ámmé para ákniyu. ³ Pasóddór yu tun ta langun rubbad i Israel na tun ta ikasapulù álló kani bulan ni, tō kada mama na duwán sawa kailangan sumalin ka nati

ka karnero ó nati ka kambing na nángngà para kannán ka kandin pamilya. Sábbad mannanap tô iyón katô kada pamilya. ⁴ Atin ka délák dád tô pamilya, asta dì makémmát kuman ka sábbad mannanap, sábbad dád mannanap tô kannán katô duwa pamilya na ágpasimbalayé. Agad ándin tô lumun dan kailangan makanángngà katô karapungan dan asta kadakállan katô makan dan. ⁵ Mému ka salinán yu tô karnero ó tô kambing, asal kailangan salinán yu tô mama na gidad ka sábbad ámmé, asta ándà gó depekto. ⁶ Iyó yu ni ka ágsalláp dán tô álló katô ikasapulù áppat álló kani bulan ni,^o su tô gó tô álló na padángngané tô langun pamilya katô mga rubbad i Israel na miyó katô mga mannanap na igsalin dan. ⁷ Atin ka iyón yu tô mannanap, pólét yu tô dipanug tun ta duwa ligad katô sállat asta dadan tun datas katô sállat katô mga balé na kannan yu katô mga mannanap. ⁸ Atin ka dukilám dán, ággang yu, asta kan yu duma katô pan na ándà pagpatubù asta katô mga gulay na mappait. ⁹ Yakó ágkan katô karne na igsabawan ó ándà ággangi. Ággang yu gó tô tibuk mannanap, agad tô ulu, tô paa, asta tô mga bituka. ¹⁰ Kan yu tô tibuk lawa dalám ka dukilám. Yakó ágsamà, agad délák, sippang ka sállám. Atin ka duwán masamà na dì ágkémmát, góbbó yu. ¹¹ Atin ka kuman kó, kailangan mangómpak kó ébô tumaganà kó na panó. Állán kó, sandalyas kó, asta awid kó katô tukád yu. Sékót kó kan. Ni gó tô lumun yu ka dukilám ka lumabéya na Áglangngagán yu. ¹² Tô dukilám tô, madunna tun ta Ehipto, asta matayan

^o **12:6** 12:6 Ahaán tô Exodo 13:4.

ku tō langun tambang kaké mama, agad manubù ó mannanap. Sakán gó tō Áglangngagán, asta supakan ku tō langun ágmanaman na ágpangadapán tun ta Ehipto. ¹³ Tō dipanug na pólétán yu tun ta duwa ligad ka sállat, tō gó é pató tun ta mga balé na góddóan yu. Atin ka kitanán ku tō dipanug, labéyan kù sikiyu. Agad supakan ku tō mga taga Ehipto, asal dì kó kadattan. ¹⁴ Kailangan dì yu kalingawan ni álló ni sippang tun ta ándà ágtamanán. Kada ámmé, kailangan palimudé kó asta tō mga rubbad yu ébô pabantugánna ikiyu tingód katô iglumu ku para ákniyu.”

Kalimudan Tingód Ka Pan Na Ándà Pagpatubù

¹⁵ “Dalám ka pittu álló, kan yu tō pan na ándà pagpatubù. Tun ta tagnà álló, iwà yu tō langun ka pagpatubù ka pan tikud tun ta mga balé yu, su atin ka duwán kuman katô pan na duwán pagpatubù tikud tun ta tagnà álló sippang tun ta ikapittu álló, kailangan péwaán yu sikandin tikud tun ta grupo yu na mga rubbad i Israel. ¹⁶ Tun ta tagnà álló asta tun ta ikapittu álló, palimudé kó ébô mangadap kó kanak. Tō duwa álló tō, ándà palang lumun yu, asal makému kó móéméng. ¹⁷ Imu kó gó kani Kalimudan Tingód Ka Pan Na Ándà Pagpatubù ébô dì yu kalingawan na ni álló ni tō kapid ku katô langun yu tikud tun ta Ehipto. Imu yu ni álló ni na kalimudan yu, agad sikiyu ó tō mga rubbad yu, kada ámmé sippang tun ta ándà ágtamanán. ¹⁸ Tō tagnà bulan, tikud tun ta dukilám katô ikasapulù áppat (14) álló sippang ka dukilám katô ikaduwa pulù sábbad (21) álló, kailangan kannán yu tō pan na ándà pagpatubù. ¹⁹ Dalám ka pittu álló,

kailangan ándà palang pagpatubù tun ta mga balé
yu, su atin ka duwán kuman katô pan na duwán
pagpatubù, agad rubbad i Israel ó ánnà, kailangan
péwaán yu sikandin tikud tun ta grupo yu na mga
rubbad i Israel. ²⁰ Dalám ka pittu álló, yakó gó
ágkan katô pan na duwán pagpatubù. Kan yu dád
tô pan na ándà pagpatubù.”

Tagnà kakan dan tingód katô dukilám ka kalabé

²¹ Igpatawar i Moises tô langun katô ágpangulun
ka mga rubbad i Israel, asta igkagiyán din, na mà
din, “Kagiyi yu tô tagsábbad-sábbad pamilya na sal-
inán dan tô nati ka karnero ó nati ka kambing, asta
iyón dan tingód katô kalabé katô Áglangngagán.
²² Salud yu tô dipanug tun ta palanggana. Tugsak
yu tô panga ka isupu tun ta dipanug na igsalud
tun ta palanggana, asta pólét yu tô dipanug tun ta
duwa ligad katô sállat asta dadan tun datas katô
sállat. Yakó ágluwà tikud tun ta balé yu sippang
ka sállám, ²³ su panó-panó tô Áglangngagán tun ta
kaluwagan ka Ehipto ébô matayan din tô mga taga
Ehipto. Asal ka kitanán din tô dipanug tun ta duwa
ligad katô sállat asta dadan tun datas katô sállat,
lumabé sikandin. Dì din pahun tô taramaté na
panaligan tun ta balé yu, asta dì matayan tô mga
tambang kaké gabatà yu gamama. ²⁴ Kada ámmé,
kailangan bánnalán yu ni sugù, agad sikiyu asta
tô mga rubbad yu sippang tun ta ándà ágtamanán.
²⁵ Atin ka dumunggù kó tun ta tanà na igtandô
katô Áglangngagán na bággén din ákniyu, kailangan
inalayun yu bánnalán ni sugù ni. ²⁶ Atin ka minsà
tô mga gabatà yu ka manan ka áglumun yu ni

ágkémun ni, ²⁷ kagiyi yu sikandan na ni gó tô sugù tingód katô kalabé katô Áglangngagán, su iglabéyan din tô mga balé na góddóan katô mga rubbad i Israel tun ta Ehipto. Agad igmatayan din tô mga taga Ehipto, asal ándà ki ikandin matayi.”

Na, tô igpaminág dan ni igkagi i Moises kandan, iglingkóod tô langun dan, asta igpangadap dan tun ta Áglangngagán. ²⁸ Igpampánó dan, asta ighbánnal dan tô igsugù katô Áglangngagán ki Moises asta ki Aaron.

Igmatayan tô mga tambang kaké gabatà gamama

²⁹ Tun ta tángngà ka dukilám, igmatayan katô Áglangngagán tô langun tambang kaké gabatà gamama tun ta kaluwagan ka Ehipto, agad tô tambang kaké batà mama katô harì na sumui kandin, agad tô mga tambang kaké gabatà gamama katô mga igpriso. Igmatayan din tô tambang kaké mama katô mga mannanap. ³⁰ Tô dukilám tô, ikannó tô harì, tô mga opisyales din, asta tô langun taga Ehipto. Igdarawit dan, su duwán inaté tun ta tagsábbad-sábbad balé. ³¹ Tô dukilám tô, igpatawar katô harì si Moises asta si Aaron, asta igkagiyán din, na mà din, “Na, panó kód gó langun, asta iwà kód tikud dini áknami na mga taga Ehipto. Sadun kó asta pangadap kó katô Áglangngagán na Manama yu iring katô igkagi din ákniyu. ³² Pid yu tô mga karnero yu, tô mga kambing yu, asta tô mga baka yu, asta panó kód! Dasal kó pagsik ébô madigár tô dumunggù kanak!”

³³ Igpamagaan katô mga taga Ehipto tô mga rubbad i Israel na tumanan katô banuwa ka Ehipto.

Igkagi sikandan, na mà dan, “Atin ka dì kó miwà, maté ké gó langun.”

³⁴ Purisu igkangé katô mga rubbad i Israel tô mga palanggana na igdalámmán ka harina na igmasa dan asal ándà pa tagui ka pagpatubù, igdalám dan ni tun ta umpak dan, igtángngás dan, asta igpid dan. ³⁵ Igbánnal katô mga rubbad i Israel tô igkagi i Moises kandan, asta iga pamuyù dan tô mga salagbat, tô mga paningsing, tô mga pangkis, tô bulawan mga arites, asta tô mga umpak tun ta mga simbalé dan na taga Ehipto. ³⁶ Igimu katô Áglangngagán na madigár tô panámdám katô mga taga Ehipto tingód katô mga rubbad i Israel, asta ighbággé dan tô langun iga pamuyù dan. Ukit ka kapamuyù katô mga rubbad i Israel, inémmát tô kaduwánnan katô mga taga Ehipto.

Igiwà tô mga rubbad i Israel tikud tun ta banuwa ka Ehipto

³⁷ Igpanó tô mga rubbad i Israel tikud tun ta Rameses, asta igsadun dan tun ta Sucot. Duwán mga ánnám gatus mararan (600,000) na mga gamama, asta ándà kényap tô mga gabayi asta mga gabatà. Igpanóttanà dan. ³⁸ Marapung pagsik tô ássa mga manubù na igtákkás kandan, asta marapung tô mga karnero, tô mga kambing, asta tô mga baka dan. ³⁹ Atin ka ágsódô dan ébô kuman, ággamitán dan tô igmasa na ándà pagpatubù na igpid dan tikud tun ta Ehipto, asta áglutuán dan tô pan tun ta baga. Tô harina dan ándà tagui katô pagpatubù su sékót dan iga péwà tikud tun ta Ehipto, asta ándà timpo para taganaán tô ágkannán dan asta patubuán tô pan.

40 Igóddô tō mga rubbad i Israel tun ta Ehipto dalám ka áppat gatus tállu pulù (430) ámmé. **41** Tun ta tapuri gó álló katô áppat gatus tállu pulù (430) ámmé, igiwà tō mga sakup katô Áglangngagán tikud tun ta Ehipto. **42** Tō gó tō dukilám na ighbanté tō Áglangngagán ébô piddán din tō mga sakup din tikud tun ta banuwa ka Ehipto. Purisu kailangan ágbanté tō mga rubbad i Israel ébô dì dan kalin-gawan tō iglumu katô Áglangngagán kandan, asta pabantugán dan sikandin kada ámmé sippang tun ta ándà ágtamanán.

Mga sugù tingód katô Kalimudan Ka Kalabé

43 Na, igkagi tō Áglangngagán ki Moises asta ki Aaron, na mà din, “Ni gó tō mga sugù ku tingód katô Kalimudan Ka Kalabé. Dì mému kuman tō mga ánnà rubbad i Israel. **44** Asal atin ka igtupuwan tō mga álland na ighbálli yu, mému makakan dan. **45** Dì makakan tō mga ágróggun na góddô, asta tō mga taralumu na ágtandanan. **46** Kailangan kannán ni mannanap tun ta balé na igággangan. Dì mému piddán yu ni tun ta luwà ka balé. Dì mému pantigán tō mga tullan. **47** Kailangan padángngané tō langun rubbad i Israel tun ta Kalimudan Ka Kalabé. **48** Atin ka duwán ánnà mga rubbad i Israel na góddô duma ákniyu, asta malyag dan na mapil ákniyu ébô mamista katô Kalimudan Ka Kalabé, kailangan patupu tō langun gamama ébô makapil dan ákniyu. Makakan dan katô Kalimudan Ka Kalabé iring katô bánnal na mga rubbad i Israel. Asal dì gó makakan tō ándà tupuwi. **49** Tō gó tō ágkémun na kailangan

ágtumanán katô mga rubbad i Israel, asta tô ánnà mga rubbad i Israel na góddô tun ákniyu.”

⁵⁰ Purisu igbánnal katô langun rubbad i Israel tô igsugù katô Áglangngagán ki Moises asta ki Aaron.

⁵¹ Tô gó tô álló na igpid katô Áglangngagán tô mga rubbad i Israel tikud tun ta banuwa ka Ehipto. Ipgaglimud din sikandan tun ta tagsábbad-sábbad pamilya dan.

13

Ágbággén tô mga tambang kaké gabatà tun ta Áglangngagán

¹ Na, igkagi tô Áglangngagán ki Moises, na mà din,
² “Bágge yu kanak tô langun tambang kaké gabatà yu gamama asta tô tambang kaké nati mama katô mga mannanap yu, su kanak sikandan.”

Kalimudan Tingód Ka Pan Na Ándà Pagpatubù

³ Na, igkagi si Moises katô mga manubù, na mà din, “Kailangan dì yu kalingawan ni álló ni, su ni gó tô kewà yu tikud tun ta Ehipto na lugar ka kallang ákniyu. Igpewà kó katô Áglangngagán ukit katô makasalábbù katulusan din. (Yakó ágkan katô pan na duwán pagpatubù.) ⁴ Ni álló ni tun ta tagnà bulan ka Abib p tó kewà yu tikud tun ta Ehipto.

⁵ “Purisu atin ka piddán kód katô Áglangngagán tun ta tanà na igóddóan katô mga Canaanhon, mga Hetihanon, mga Amorihanon, mga Hebihanon, asta mga Jebusihanon, kailangan palimudé kó gó

P 13:4 13:4 Tagnà bulan, ó bulan ka Abib: mga tángngaan ka Marso sippang tun ta tángngaan ka Abril.

ni bulan ni. Tô gó tô tanà na tuu malambù na igtandô katô Áglangngagán tun ta mga kamónaan yu na bággén din ákniyu. ⁶ Dalám ka pittu álló, kan yu tô pan na ándà pagpatubù. Tun ta ikapittu álló, palimudé kó ébô pabantugán yu tô Áglangngagán. ⁷ Dalám ka pittu álló, kan kó katô pan na ándà pagpatubù. Tun ta kaluwagan katô banuwa yu, kailangan ándà gó palang pagpatubù ó pan na duwán pagpatubù. ⁸ Tô álló tô, pénagpát yu ni tun ta mga gabatà yu, na, ‘Gimun ni langun kani ébô kasampáttan tô igimu katô Áglangngagán para áknami tô igréwà ké ikandin tikud tun ta banuwa ka Ehipto.’

⁹ “Ni áglumun yu ni iring na pató tun ta bállad yu ó tun ta bukád yu. Ukit katô kapalimudé yu, dì yu ágkalingawan na kailangan ulit-ulitán yu tô mga sugù katô Áglangngagán, su sikandin tô igréwà ákniyu tikud tun ta banuwa ka Ehipto ukit katô katulusan din. ¹⁰ Purisu palimudé kó kada ámmé tun ta timpo na igsalin katô Áglangngagán.

¹¹ “Igtandô tô Áglangngagán na póddóán kó tun ta tanà na igóddóan katô mga Canaanhon. Atin ka póddóán kó dutun, ¹² bággé yu tun ta Áglangngagán tô mga tambang kaké gabatà yu gamama, asta tô tambang kaké nati mama katô mga mannanap yu, su tô Áglangngagán tô tigatun kandan. ¹³ Atin ka ágpamasusun tô tambang kaké nati mama katô asno yu, tábbus yu ka nati ka karnero. Asal ka dì yu tábbusán tô asno, kailangan táppuán yu tô alig din ébô maté. Kailangan tábbusán yu tô mga tambang kaké gabatà yu gamama.

14 “Atin ka duwán álló na minsà tô gabatà yu na manan ka ágtábbusán yu tô tambang kaké, taba yu sikandan, ‘Igpewà tô Áglangngagán áknami tikud tun ta banuwa ka Ehipto. Inallang ké, asal ikewà ké ukit katô katulusan din. **15** Tô igéllé tô harì na péwà áknami, igmatayan katô Áglangngagán tô mga tambang kaké gabatà gamama katô taga Ehipto, agad tô mga manubù asta tô mga mannanap. Purisu ágbággén ta tun ta Áglangngagán tô langun tambang kaké gabatà ta gamama asta tô mga tambang kaké nati mama katô mga mannanap. Asal ágtábbusán ta tô mga tambang kaké gabatà ta gamama.’ **16** Ni ágkémun ta ni iring na pató tun ta bállad ta ó tun ta bukád ta, su igapéwà ké katô Áglangngagán tikud tun ta banuwa ka Ehipto ukit katô katulusan din.”

Tô sagulapun asta tô apuy

17 Tô igapéwà katô harì ka Ehipto tô mga rubbad i Israel, ándà dan pókiti katô Manama tun ta dalan tun ta tanà na igóddóan katô mga manubù na ánggadan na Filistihanon, agad madani, su igkagi tô Manama, na mà din, “Atin ka dungguan tô mga rubbad i Israel ka gira, mapalin tô panámdám dan, asta lumónód dan tun ta Ehipto.”

18 Purisu igapid din sikandan na igukit tun ta disyerto dadan tun ta Dagat na Mallutù. Tô igiwà tô mga rubbad i Israel tikud tun ta Ehipto, igapid dan tô mga laniban dan agó duwán sumulung kandan.

19 Igpid i Moises tô mga tullan i Jose, su taganà igtandô tô mga rubbad i Israel ki Jose sayyan na tô gó é lumun dan. Tô ándà pa kamaté si Jose, igkagi

sikandin, na mà din, “Atin ka péwaán kó katô Marama tikud tun ta Ehipto, pid yu tô mga tullan ku.”^q ²⁰ Tô igpanó dan tikud tun ta Sucot, igkampo dan tun ta Etam, tun ta ligad katô disyerto. ²¹ Igladé ka álló na iguna tô Áglangngagán kandan ukit katô sagulapun na iring na sumbál ébô kasóddóran dan ka ánda tô sadunan dan. Igladé ka dukilám na iguna sikandin kandan ukit ka apuy na iring na sumbál ébô tumaddó kandan. Purisu ikapanó dan agad álló asta dukilám. ²² Inalayun dan ágkitanán tô sagulapun ka álló, asta tô apuy ka dukilám.

14

Igtalipag dan tun ta Dagat na Mallutù

¹ Igkagi tô Áglangngagán ki Moises, na mà din, ² “Kagiyi nu tô mga rubbad i Israel na sumuwé dan, asta póddô nu pa róggun sikandan madani tun ta Piyahirot tun ta tángngaan katô Migdol asta Dagat na Mallutù madani tun ta Baalsepon, ³ su manámdám tô harì ka Ehipto na itadin kó, asta dì kó makaluwà tun ta disyerto. ⁴ Patággasán ku tô ulu ka harì, asta agtaán kó ikandin. Purisu pabantugánnna ukit katô kapanaluwan ku katô harì asta katô mga sundalo din. Kasóddóran katô mga taga Ehipto na sakán tô Áglangngagán.”

Igbánnal katô mga rubbad i Israel tô igsugù ka Manama kandan.

⁵ Tô igulitan tô harì ka Ehipto na igiwà dán tô mga rubbad i Israel, ipalin tô panámdám din asta tô panámdám katô mga opisyales din tingód katô mga rubbad i Israel, asta igkagi sikandan, na mà

^q **13:19** 13:19 Ahaán tô Genesis 50:25-26.

dan, “Manan ka igapéwà ta gó tó mga rubbad i Israel? Ándà dán gó mga állang ta.”

⁶ Na, igtaganà katô harì tó kalesa din na para ka gira asta tó mga sundalo din. ⁷ Igpid din tó ánnám gatus (600) madigár kalesa asta tó duma pa mga kalesa na ágsakayan katô mga opisyales din. ⁸ Igpatággas katô Áglangngagán tó ulu ka harì, asta iglupug din tó mga rubbad i Israel na igiwà ukit katô kadóppón katô Áglangngagán kandan. ⁹ Iglupig tó langun sundalo katô harì ka Ehipto, agad tó mga igsaké ka kalesa, tó mga igsaké ka kudà, asta tó mga igpanóttanà. Inasabban dan tó mga rubbad i Israel na igkampo madani tun ta Pihahirot tun ta ligad katô Dagat na Mallutù.

¹⁰ Na, tó madani dán tó harì asta tó mga sundalo din, tuu imáddangan tó mga rubbad i Israel, asta igrangin dan katô Áglangngagán. ¹¹ Igkagi sikan-dan ki Moises, na mà dan, “Manan ka igpid ké ikuna ébô maté ké dini ta disyerto? Manan? Ándà dán gó lábbángngan áknami tun ta Ehipto? Sállág nu ka ándin tó inókitan dé! ¹² Yaka nu ágkalingawi tó igkagi dé áknikó tó ándà ki pa panó na dungguan ki katô madat. Igkagiyan dé sikuna, na mà dé, ‘Pabayà kéd na pallang katô mga taga Ehipto.’ Madigár pa gó ka manayun ké móddô na állang ka tandingán katô maté ké tun ta disyerto.”

¹³ Igkagi si Moises katô mga manubù, na mà din, “Yakó ágkamáddangan! Pasarig yu tó panámdám yu, asta sállág yu tó lumun katô Áglangngagán ni álló ni ébô paluwaán kó ikandin. Tó mga taga Ehipto na ágkitanán yu, dì yud gó kitánán puman.

14 Tô Áglangngagán tô manalu kandan, asta ándà dán lumun yu.”

15 Igkagi tô Áglangngagán ki Moises, na mà din, “Manan ka ágrangin ka kanak? Kagiyi nu tô mga rubbad i Israel na kailangan manayun dan tun tóna. **16** Tayó nu tô tukád nu asta táddù nu tun ta dagat, asta matángngà tô dagat ébô makapanó tô mga rubbad i Israel tun ta matákkang tanà.

17 Patággasán ku tô ulu ka mga taga Ehipto ébô lupugán dan tô mga rubbad i Israel. Ukit kani, pabantugáんな ukit katô kapanaluwan ku katô harì ka Ehipto asta tô langun sundalo din, agad tô mga igsaké ka kalesa asta tô mga igsaké ka kudà. **18** Kasóddoran katô langun taga Ehipto na sakán tô Áglangngagán ukit ka igtalu ku tô harì dan, tô mga sundalo din na ágsaké ka mga kalesa, asta tô mga ágsaké ka mga kudà.”

19 Na, tô panaligan ka Manama na guna tun ta mga rubbad i Israel igalin dadan tun ta bókkög dan. Tô sagulapun na iring na sumbál igalin dadan tun ta bókkög dan. **20** Igsunnad tun ta tángngaan katô mga sundalo ka taga Ehipto asta mga rubbad i Israel. Tô dukilám dán, tô sagulapun na iring na sumbál inému na apuy na igbágge ka kappawaan tun ta mga rubbad i Israel. Asal tô sagulapun inému na mangittáng tun ta mga taga Ehipto, asta ándà dan ikapadani tun ta mga rubbad i Israel tô dukilám.

21 Na, igtayó i Moises tô bállad din, asta igtáddù din tun ta dagat. Igpapid katô Áglangngagán tô mabákkár karamag tikud tun ta silatan na igladé ka dukilám. Itángngà tô dagat, asta itákkang tô

tanà tun ta tángngaan ka dagat. ²² Inému tô dagat na iring na duwa labat tun ta ibang asta tun ta kawanan dan, asta igukit tô mga rubbad i Israel tun ta matákkang tanà tun ta tángngaan katô dagat. ²³ Iglupug tô mga taga Ehipto, agad tô langun sundalo na igsaké katô mga kalesa dan. Igitur dan katô igukitan katô mga rubbad i Israel tun ta tángngaan katô dagat. ²⁴ Tô ándà pa kasállám, igsállág tô Áglangngagán katô mga sundalo tikud tun ta sumbál na apuy. Iglimáddang asta iglibug din sikandan. ²⁵ Ikasanggat tô mga ligid katô mga kalesa, asta ágkatággasan dan ágpapalaguy. Igpapagayisé tô mga taga Ehipto, na mà dan, “Miwà kid tikud kannun, su igdapit tô Áglangngagán kandan asta dì ki manalu kandan.”

²⁶ Igkagi tô Áglangngagán ki Moises, na mà din, “Táddù nu puman yan bállad nu tun ta dagat ébô lumónód tô dagat asta katambunan tô mga taga Ehipto.”

²⁷ Purisu igtáddù i Moises tô bállad din tun ta dagat, asta tô igsállám dán, iglónód tô dagat. Igkinnam tô mga taga Ehipto na malaguy, asal igpasabban katô Áglangngagán ka dagat. ²⁸ Iglónód tô dagat, asta itambunan tô mga kalesa, tô mga ágsaké kani, asta tô langun sundalo katô harì na iglupug kandan sippang tun ta dagat. Ándà gó palang sábbad na isamà. ²⁹ Asal inému tô dagat na iring na duwa labat tun ta ibang asta tun ta kawanan dan, asta igukit tô mga rubbad i Israel tun ta matákkang tanà tun ta tángngaan katô dagat.

³⁰ Tô gó tô kapaluwà katô Áglangngagán katô mga rubbad i Israel. Igkita dan tô mga inaté lawa

katô taga Ehipto na inanud tun ta ligad ka dagat.
 31 Tô igkita dan tô katulusan katô Áglangngagán na iggamit din ébô dì dan matalu katô mga taga Ehipto, iga pangadap dan kandin. Igsarigan dan tô Áglangngagán asta tô ágsuguánnán din na si Moises.

15

Tô kanta i Moises

1 Na, igkanta si Moises asta tô mga rubbad i Israel tun ta Áglangngagán. Igkanta dan kani, na mà dan,

“Kantaan ku tô Áglangngagán, su tuu madigár tô kapanaluwan din.

Igantug din tun ta dagat tô mga kudà asta tô mga igsaké kani.

2 Tô Áglangngagán tô masarig taradóppón kanak, asta ágkanta a tingód kandin.

Sikandin gó tô iga paluwà kanak.

Sikandin tô Manama na pangadapán ku, asta durungán ku sikandin.

Sikandin tô Manama na ágpangadapán katô ámmà ku,

asta pabantugán ku sikandin.

3 Magani tô Áglangngagán, asta YAHWEH tô ngadan din.

4 Igpangantug din tun ta dagat tô mga kalesa asta tô mga sundalo katô harì ka Ehipto.

Ilánnád tô mga opisyales din tun ta Dagat na Mallutù.

5 Itambunan dan katô madalám dagat, asta ilánnád dan iring na batu tun ta kadalámmán ka dagat.

6 Áglangngagán, tuu madigár tô katulusan nu.

Ágrupákkán nu tô mga usig nu.

7 Tuu madigár tô kapanaluwan nu,
asta igtalu nu tô mga usig nu.

Igpandà nu sikandan tingód katô sókó nu,
iring na apuy na ággóbbó ka ragami.

8 Igidup ka, asta ilimud tô dagat.
Igtindág tô dagat iring na labat.

Igmatággas tô kadalámmán katô dagat.

9 Igkagi tô usig nu, ‘Lupugán ku sikandan,
kasabban ku, asta ámmáttán ku.

Taladán ku tô mga kaduwánnan dan,
asta sulian ku sikandan.

Tagnusán ku tô kampilan ku,
asta dadattan ku tô langun dan.’

10 Asal igidup nu sikandan,
asta itambunan dan ka dagat.

Ilánnád dan tun ta kadalámmán katô dagat iring na
timággà.

11 Áglangngagán, ándà palang mga ágmanaman na
magunawa áknikó!

Ándà palang ugis na tuu madigár iring áknikó!

Ándà palang ássa na duwán katulusan na
ágkasalábbuan!

12 Iggamit nu tô bállad nu,
asta iglámmád katô tanà tô mga usig dé.

13 Ukit katô ginawa nu na ándà ágtamanán, igpid nu
tô mga manubù na igtábbus nu.

Ukit katô bákkár nu, igagak nu sikandan tun
ta ugis góddóan nu.

14 Ikadinág tô mga manubù tun ta duma mga
banuwa,

asta igkárkár dan tingód ka máddang dan.

Tuu imáddangan tô mga Filistihanon.

- 15** Imáddangan tô mga ágpangulun tun ta Edumea.
Igkárkár tô magani mga manubù tun ta Moab.
Mataló tô langun na igóddô tun ta Canaan.

16 Imáddangan asta igkállas dan.

Áglangngagán, su igkita dan tô matulus áglumun nu,
igtagnáp dan iring na batu,
sippang ka iglabé tô mga sakup nu,
sippang ka iglabé tô mga manubù na igtábbus
nu.

- 17** Piddán nu sikandan asta póddóán nu tun ta
pabungan na igsalin nu.
Tô gó tô lugar na igimu nu na góddóan nu,
Áglangngagán,
tun ta templo na igimu nu.

- 18** Mangulu tô Áglangngagán sippang tun ta ándà
ágtamanán.”

- 19** Tô gó tô igkanta dan su igukit tô mga rubbad
i Israel katô dagat tun ta matákkang tanà. Asal
igpalónódan katô Áglangngagán ka dagat tô langun
kudà katô harì ka Ehipto, tô mga kalesa asta tô
mga sundalo na igsaké na iglupug kandan tun ta
tángngaan ka dagat, asta ilánnad dan langun.

Tô kanta i Miriam

- 20** Na, propeta sí Miriam na tábbé i Aaron asta i
Moises. Igkangé din tô tamburin, asta igpatákkás
din tô langun ka duma mga gabayi na igaing
katô mga tamburin asta igsayó. **21** Igkanta si
Miriam tun kandan, na mà din,
“Kantayi yu tô Áglangngagán ta, su tuu madigár tô
kapanaluwan din.

Igantug din tun ta dagat tō mga kudà asta tō
mga igsaké kani.”

Tō wayig na mappait

²² Igpid i Moises tō mga rubbad i Israel, igpanó dan tikud tun ta Dagat na Mallutù, asta igsadun dan tun ta disyerto tun ta Sur. Itálluwan dan igpanó tun ta disyerto, asal ándà wayig na igkita dan. ²³ Tō igdunggù dan tun ta Mara, agad duwán wayig, asal ándà dan ikénám su mappait. Purisu inggañadan ni na Mara.^r ²⁴ Igburáng-buráng^s tō mga manubù ki Moises, asta iginsà sikandan, na mà dan, “Ándin tō inámmán ta?”

²⁵ Purisu igrangin si Moises tun ta Áglangngagán, asta duwán kayu na igañadan ni na igpakita katô Áglangngagán kandin. Tō igantug i Moises tō panga ka kayu tun ta wayig, inému tō wayig na madigár ginámmán.

Na, dutun ta Mara duwán igsugù katô Áglangngagán kandin, asta igkinnaman din sikandan. ²⁶ Igkagi tō Áglangngagán, na mà din, “Atin ka tuu kó maminág kanak, asta lumun yu tō nángngà tun ta saruhan ku, asta mánnal kó katô mga sugù ku, asta tumanán yu tō langun ka palumun ku ákniyu, dì ku sikiyu supakan katô mga bógók na igpapid ku tun ta mga taga Ehipto. Sakán tō Áglangngagán na ágtabang ákniyu ébô kólian tō mga bógók yu.”

²⁷ Na, tō igpanó dan dán tikud tun ta Mara, igdunggù dan tun ta Elim na duwán sapulù duwa (12) mga sánnáp asta kapittuwan (70) mga kayu

^r **15:23** 15:23 Tō kóbádan ka Mara, “mappait.” ^s **15:24** 15:24 Igburáng-buráng, ó igañadan ni na igpakita katô Áglangngagán kandin.

palmera. Igóddô dan róggun madani tun ta mga sánnáp.

16

Mana asta mga pitó

¹ Igpanó tō mga rubbad i Israel tikud tun ta Elim, asta igsadun dan tun ta Sin na disyerto tun ta tángngaan ka Elim asta Sinai. Tō igdunggù dan, iglabé tō sábbad bulant tikud tun ta kewà dan tikud tun ta Ehipto. ² Tun ta disyerto, igburáng-buráng dan langun ki Moises asta ki Aaron. ³ Igkagi sikan-dan, na mà dan, “Tuu pa madigár ka igmatayan ké katô Áglangngagán tun ta Ehipto, su madigár é ágkakan dé dutun. Asal igpid ké ikiyu dini ta disyerto ébô maté ké langun ukit ka ballus.”

⁴ Na, igkagi tō Áglangngagán ki Moises, na mà din, “Dabuán ku tō pan para ákniyu tikud tun ta langit iring na udan. Kada álló kailangan lumimud tō mga manubù katô pan na nángngà para kannán dan dalám ka sábbad dád álló. Ukit kani, kinnaman ku sikandan ka mánnal dan katô mga sugù ku kandan. ⁵ Sugù yu sikandan na kailangan dublin tō pan na limudán dan tun ta ikannám álló kada linggo.”

⁶ Purisu igkagiyan i Moises asta i Aaron tō lan-gun rubbad i Israel, na mà dan, “Kani ka ágsalláp dán tō álló, kasóddóran yu na tō Áglangngagán tō ig-pid ákniyu tikud tun ta Ehipto, ⁷ su simag ka sállám,

t **16:1** 16:1 Sábbad bulan, ó tun ta ikasapulù lima (15) álló tun ta ikaduwa bulan. Igiwà dan tikud tun ta Ehipto ka ikasapulù áppat (14) álló tun ta una bulan. Igsulat ni tun ta Exodo 12:6.

kitanán yu tô séllaán katô Áglangngagán. Igdinág din tô kaburáng-buráng yu tingód kandin. Bánnal na igburáng-buráng kó tingód katô Áglangngagán, ánnà tingód áknami.”

⁸ Igkagi si Moises, na mà din, “Tô Áglangngagán tô mággé ákniyu ka karne kada ágsalláp tô álló, asta mággé ákniyu ka pan kada sállám. Igpaminág sikandin katô kaburáng-buráng yu tingód kandin. Bánnal na igburáng-buráng kó ánnà tingód áknami, asal tingód katô Áglangngagán.”

⁹ Igkagi si Moises ki Aaron, na mà din, “Kagiyi nu tô mga manubù, na, ‘Padani kó tun ta saruhan katô Áglangngagán, su igpaminág din tô kaburáng-buráng yu.’”

¹⁰ Róggun igkagi si Aaron katô mga manubù, igsállág dan tun ta disyerto. Igkita dan tô séllaán katô Áglangngagán tun ta sagulapun na igtákkás kandan. ¹¹ Igkagi tô Áglangngagán ki Moises, na mà din, ¹² “Igdinág ku tô kaburáng-buráng katô mga sakup ku. Kagiyi nu sikandan na kani ka ágkasalláp dán, tanggapán dan tô karne, asta simag ka sállám, tanggapán dan tô pan na nángngà para kandan. Purisu kasóddóran dan na sakán tô Áglangngagán na Manama dan.”

¹³ Tô ágkasalláp dán tô álló, marapung tô mga pitó na igidunggù, asta igsunnad tô mga pitó tun ta kaluwagan katô kampo dan. Tô igsállám dán, duwán damur tun ta kampo dan.

¹⁴ Na, tô itákkang dán tô damur, duwán igkita dan na marénták, manipis asta mapputì tun ta

kaluwagan ka tanà. ¹⁵ Tô igkita dan, igapénsaé dan, na mà dan, “Ándin ni?”

Igkagi si Moises kandan, na mà din, “Ni gó tô igbággé katô Áglangngagán ákniyu ébô kannán yu. ¹⁶ Igsugù tô Áglangngagán na kailangan limudán yu langun tô ágkailanganán yu. Limud kó ka duwa litro para katô tagsábbad-sábbad manubù tun ta pamílya yu.”

¹⁷ Purisu igbánnal tô mga rubbad i Israel. Duwán mga manubù na iglimud ka dakál, asta duwán mga manubù na iglimud ka délák dád. ¹⁸ Asal tô igtáppáng dan kani, tô iglimud ka dakál, ándà kasobrayi, asta tô iglimud ka délák, ándà kakulangi. Nángngà tô iglimud para katô tagsábbad-sábbad manubù.

¹⁹ Na, igkagi si Moises kandan, na mà din, “Yakó ágsamà para ka simag.”

²⁰ Asal duwán gó mga manubù na ándà paminág ki Moises, asta duwán igsamà dan para ka simag. Asal tô sállám dán, igulád asta imawù. Purisu isókó si Moises kandan.

²¹ Kada sállám iglimud tô tagsábbad-sábbad pamílya katô ágkailanganán dan. Asal tô igménit dán tô álló, itunó tô isamà tun ta tanà.

²² Tun ta ikannám álló, iglimud dan tô dubli, su duwán áppat litro para katô tagsábbad-sábbad manubù. Purisu igsadun tô mga ágpangulun tun ki Moises, asta igulit dan kandin. ²³ Igkagi si Moises, na mà din, “Simag tô ikapittu álló, asta igsugù tô Áglangngagán na tô ikapittu álló, tô gó é álló ka kapaginawa. Ándà ássa lumun ta kannà pangadapán ta sikandin. Purisu lutù yu asta óméng

yu tō ágkadigárran yu, asta tagù yu tō samà para kannán yu ka simag.”

²⁴ Purisu igtágù dan sippang simag, magunawa katô igsugù i Moises kandan. Pagkasimag, madigár pô tō igsamà dan, su ándà uláddi asta ándà kamawù. ²⁵ Igkagi si Moises, na mà din, “Ni gó tō kannán yu ni álló ni, su ni gó tō álló ka kapaginawa ébô pabantugán ta tō Áglangngagán. Ándà ágkakan na kitanán yu tun ta tanà ni álló ni. ²⁶ Limud yu tō ágkakan dalám ka ánnám dát álló, asal tō ikapittu álló tō álló ka kapaginawa ta. Ándà ágkakan na kitanán yu tun ta tanà.”

²⁷ Na, agad tun ta ikapittu álló, duwán duma mga manubù na igpamasak katô ágkakan. Asal ándà gó igkita dan. ²⁸ Igkagi tō Áglangngagán ki Moises, na mà din, “Manan ka ándà kó bánnal katô mga sugù ku asta mga kagi ku? ²⁹ Manan ka ándà dan ikagpát na igsalinna katô ikapittu álló ébô paginawa dan? Tô gó tō gunayan na dubli tō ágkakan na ágbággén ákniyu tun ta ikannám álló ébô duwán nángngà para katô duwa álló. Dalám ka álló ka kapaginawa, kailangan tumónnók kó. Yakó áglimud katô ágkakan tun ta ikapittu álló.”

³⁰ Purisu igpaginawa tō langun manubù tun ta ikapittu álló.

³¹ Igngadanan dan tō ágkakan na mana.^u Mapputì ni iring na marénták lisu, asta tō nanam iring katô pan na ibaláttan ka tánnáb.

³² Igkagi si Moises, na mà din, “Igsugù tō Áglangngagán na kailangan taguán ta tō duwa litro

^u **16:31** 16:31 Tô kóbádan ka mana, “Ándin ni?” Ahaán tō Exodo 16:15.

ka mana para katô mga rubbad ta ébô makita dan tô ágkakan na igbággé din áknita tun ta disyerto pángnga igpid sikandin áknita tikud tun ta banuwa ka Ehipto.”

³³ Igkagiyan i Moises si Aaron, na mà din, “Kangé nu tô bangà, asta dalám nu tô duwa litro ka mana. Tagù nu ni tun ta saruwan katô Áglangngagán ébô duwán pa ágkakitaan para katô mga rubbad ta.”

³⁴ Igbánnal si Aaron katô igsugù katô Áglangngagán ki Moises. Igtagù din ni bangà tun dalám katô kaban tingód katô kasabotan ka Manama kandan.^v ³⁵ Mana tô igkan katô mga rubbad i Israel dalám ka kappatan (40) ámmé sippang ka igóddô dan tun ta banuwa ka Canaan. ³⁶ Na, tô pagtáppáng na iggamit dan, duwán gó duwa litro.

17

Wayig tikud tun ta batu

¹ Igiwà tô mga rubbad i Israel tun ta tanà na ign-gadanan Sin, asta igalin-alin dan igkampo tun ta igsuguan katô Áglangngagán kandan. Tô igdunggù dan tun ta Repidim, ándà wayig na igkita dan para inámmán dan. ² Purisu igburáng-buráng dan dán puman, asta igkagi sikandan ki Moises, na mà dan, “Bággéyi ké ka wayig ébô duwán inámmán dé.”

Igkagi si Moises kandan, na mà din, “Manan ka ágburáng-buráng kó kanak? Manan ka ágkinnaman yu gó tô Áglangngagán?”

V **16:34** 16:34 Tingód katô mga igdalám katô kaban, ahaán tô Hebreo 9:4.

³ Asal su tuu ágkatákkangan tō mga manubù, marag dan ágburáng-buráng ki Moises, asta igkagi sikandan, na mà dan, “Manan ka igrpid ké ikuna tikud tun ta banuwa ka Ehipto? Malyag ka na maté ké ukit ka tákkang, agad tō mga gabatà dé asta tō mga mannanap dé?”

⁴ Na, igrangin si Moises katô Áglangngagán, asta igkagi sikandin, na mà din, “Pamánnun ku ni mga manubù? Masiggad ikandan timbagán ka batu ébô matéya.”

⁵ Igkagi tō Áglangngagán ki Moises, na mà din, “Pid nu tō tukád nu na iglagpás nu katô Wayig ka Nilo. Limud nu tō mga ágpangulun katô mga rubbad i Israel, asta sadun ka tun tóna kandan.

⁶ Mangatta ákniyu tun ta dakál batu tun ta Sinai.^W Lagpás nu tō batu, asta marus tō wayig ébô duwán ginámmán katô mga manubù.”

Igbánnal i Moises tō igsugù kandin róggún ágsállág tō mga ágpangulun ka mga rubbad i Israel.

⁷ Igngadanan i Moises tō lugar na Masa^X asta Meriba,^Y su ighburáng-buráng tō mga manubù ki Moises, asta igkinnaman dan tō Áglangngagán ukit katô igkagi dan, na mà dan, “Dumóppón tō Áglangngagán áknita, ó dì?”

Igpanalu dan katô mga Amalekanhon

⁸ Na, tō igkampo tō mga rubbad i Israel tun ta Repidim, igsulung tō mga Amalekanhon kandan.

⁹ Igkagi si Moises ki Josue, na mà din, “Tawar nu

^W **17:6** 17:6 Sinai, ó Horeb na ássa ngadan ka Sinai. ^X **17:7** 17:7a Tō kóbádan ka Masa, “kinnamanan.” ^Y **17:7** 17:7b Tō kóbádan ka Meriba, “ágburáng-burángngan.”

tô mga manubù, asta atu kó katô mga Amalekanhon. Simag, tumindágga tun datas katô pabungan, asta mawidda katô tukád na ighbágge ka Manama kanak.”

¹⁰ Purisu ighbánnal si Josue katô igkagi i Moises kandin. Igpíid din tô mga manubù ébô atuwan dan tô mga Amalekanhon. Igsadun si Moises, si Aaron, asta si Hur tun datas katô pabungan. ¹¹ Róggun igtayó pa i Moises tô tukád din, igpanalu tô mga rubbad i Israel. Asal róggun igapasunnad din tô tukád din, igpanalu tô mga Amalekanhon. ¹² Na, su ibállé dán tô mga bállad i Moises, igkangé si Aaron asta si Hur ka batu ébô munsad si Moises. Igtindág si Aaron asta si Hur tun ta kilidan din, asta igtayó dan tô mga bállad i Moises. Igpanayun dan igtayó kani sippang ka igsalláp tô álló. ¹³ Purisu tô langun Amalekanhon igipánnas i Josue asta tô mga kadumaan din.

¹⁴ Na, igkagi tô Áglangngagán ki Moises, na mà din, “Sulat nu ni tun ta libro, asta ulit nu ni ki Josue. Ipánnasán ku tô langun Amalekanhon ébô kalingawan sikandan ka ándà ágtamanán.”

¹⁵ Igimu i Moises tô góbbówanan katô ágbággén tun ta Manama, asta igngadanan din ni na “Tô Áglangngagán gó tô bandera ku.” ¹⁶ Igkagi sikandin, na mà din, “Igtayó tô bandera katô Áglangngagán! Purisu atuwan katô Áglangngagán tô mga Amalekanhon ka ándà ágtamanán.”

18

Igahà i Jetro si Moises

¹ Na, si Jetro na ugang i Moises asta parì tun ta Midian, ikadinág sikandin tingód katô langun na iglumu ka Manama ki Moises asta katô mga rubbad i Israel. Ikadinág sikandin na iga-péwà katô Áglangngagán sikandan tikud tun ta banuwa ka Ehipto. ² Purisu igsadun sikandin tun ki Moises. Igpid din si Sefora na sawa i Moises na taganà iga-póddô i Moises tun ta Midian. ³ Igpid pagsik i Jetro tô duwa gabatà i Moises. Si Gerson^Z tô ngadan katô tambang kaké batà din, su tô ipamasusu sikandin, igkagi si Moises, na mà din, “Ánnà a taga kannun.” ⁴ Si Elieser^a tô ngadan katô adi, su tô ipamasusu sikandin, igkagi si Moises, na mà din, “Igtabanganna katô Manama na ágpangadapán katô mga kamónaan ku, asta iga-paluwà a tikud tun ta bállad katô hari ka Ehipto.”

⁵ Si Jetro, tô sawa i Moises, asta tô mga gabatà din igsadun tun ki Moises tun ta disyerto, su iga-póddô pa sikandin asta tô mga rubbad i Israel madani tun ta pabungan na iga-sunnadan ka Manama. ⁶ Duwán igulit ki Moises, na mà din, “Igdunggù dán tô ugang nu na si Jetro, tô sawa nu, asta tô duwa gabatà yu gamama.”

⁷ Purisu iga-sumar si Moises katô ugang din. Iglingkóod asta igadák si Moises kandin. Igpaku-mustaé dan, asta igahu dan tun ta tulda i Moises. ⁸ Igulitan i Moises sikandin tingód katô langun ka iglumu katô Áglangngagán katô hari ka Ehipto asta mga sakup din ébô tabangan tô mga rubbad

^Z **18:3** 18:3 Tingód katô ngadan Gerson, ahaán tô Exodo 2:22.

^a **18:4** 18:4 Tô ngadan Elieser, iring katô kagi ka Hebreo, “igtabanganna katô Manama.”

i Israel. Igulitan din tingód ka mga kahirapan na inókitan dan tun ta dalan, asta tingód katô kapéwà katô Áglangngagán kandan. ⁹ Idayawan si Jetro tingód katô langun na iglumu katô Áglangngagán para katô mga rubbad i Israel ébô makaluwà dan tikud tun ta bállad katô mga taga Ehipto. ¹⁰ Igkagi sikandin, na mà din, “Durungán tô Áglangngagán su igañaluwà kó ikandin tikud tun ta bállad katô hari ka Ehipto asta mga sakup din! ¹¹ Ikasóddórrad na tuu pa matulus tô Áglangngagán ka tandingán tun ta langun ka ássa mga ágmanaman, su igañaluwà din tô mga sakup din tikud tun ta bállad katô mga taga Ehipto na ágpallayat-layat asta ágpahirap kandan.”

¹² Na, iggóbbó i Jetro tô mga mannanap na igbággé din katô Manama. Iglimud si Aaron asta tô mga ágpangulun katô mga rubbad i Israel, asta igkan dan duma ki Jetro tun ta saruwan ka Manama.

Igkagiyán i Jetro si Moises

¹³ Pagkasimag, igusay i Moises tô mga manubù. Igsadun dan tun kandin tikud tun ta sállám sippang ka ágkasalláp dán tô álló.

¹⁴ Tô ikakita tô ugang i Moises katô langun ka áglumun i Moises, igkagi sikandin, na mà din, “Manan ka sikuna dád tô gusay katô langun manubù? Ánnà nángngà ni! Igangat dan katô kósay nu kandan tikud tun ta sállám sippang ka ágkasalláp tô álló!”

¹⁵ Igtaba si Moises, na mà din, “Gimun ku ni su ágsadun gó tô mga manubù dini kanak ébô makasóddór dan katô kakalyag ka Manama na

bánnalán dan. **16** Atin ka ágpasamuké tō mga manubù, sakán tō rumuud kandan, asta gulitan ku sikandan ka ándin tō mga sugù asta kakalyag katô Manama.”

17 Igkagi tō ugang i Moises, na mà din, “Dì madigár ni áglumun nu! **18** Mabállé ka gó, asta mabállé tō mga manubù. Tuu gó mabággat ni ka sábbad nu dád! Dì mému ka sábbad nu dád tō musay. **19** Na, paminág ka kanak. Kagiyan ku sikuna ka ándin tō madigár lumun nu. Mólà pa ka tabangan ka katô Manama! Madigár ka sikuna tō taratapid^b para katô mga manubù tun ta saruhan ka Manama. Pid nu tun kandin tō mga problema dan. **20** Tinurù nu kandan ka ándin tō mga sugù asta kakalyag katô Manama. Pénagpát nu kandan ka ándin tō madigár ágkémun dan asta áglumun dan. **21** Asal salin nu tō ágkasarigan mga manubù na duwán kapandayan, tō mga ágrespeto katô Manama, asta tō dì ágkapid ka tandan. Imu nu sikandan na ágpangulun katô mga sábbad mararan (1,000) manubù, ágpangulun katô mga sábbad gatus (100) manubù, ágpangulun katô mga kaliman (50) manubù, asta ágpangulun katô mga sapulù (10) manubù. **22** Sikandan tō makatabang katô mga manubù ukit katô kósay dan. Atin ka duwán kaso na tuu mahirap, tō gó tō papiddán dan tun áknikó. Asal sikandan gó tō musay katô mga kaso na dì mabággat. Mému malumák tō mga áglumun nu, su makatabang dan áknikó. **23** Atin ka tumanán nu ni ágkagin ku, asta atin ka ni gó tō sugù ka Manama áknikó, makatiis ka, asta makólì ni mga manubù

b **18:19** 18:19 Taratapid, ó tarausay (tigpataliwala).

na masuné tō pusung dan.”

²⁴ Igpaminág si Moises katô ugang din, asta igbánnal din tō igkagi kandin. ²⁵ Igsalin i Moises tō mga manubù na duwán kapandayan tun ta langun rubbad i Israel, asta igimu din sikandan na ágpangulun katô mga manubù. Igimu din sikandan na ágpangulun katô mga sábbad mararan (1,000) manubù, ágpangulun katô mga sábbad gatus (100) manubù, ágpangulun katô mga kaliman (50) manubù, asta ágpangulun katô mga sapulù (10) manubù. ²⁶ Inalayun dan gusay katô mga manubù. Igpapid dan tō mga kaso na tuu mahirap tun ki Moises, asal sikandan tō igusay katô mga kaso na dì mabággat.

²⁷ Na, ándà kadugé, igtananan i Jetro si Moises, asta igulì tun ta kandin banuwa.

19

Igpakita tō Áglangngagán tun ta pabungan ka Sinai

¹ Na, tō iglabé tō duwa bulan^c ensakto tikud tun ta kéwà dan tikud tun ta banuwa ka Ehipto, igdunggù dan tun ta disyerto na igngadanan na Sinai. ² Igpanó dan tikud tun ta Repidim, igsadun dan tun ta lindig katô pabungan ka Sinai, asta igkampo dan.

³ Na, igtikáddág si Moises tun ta pabungan ébô madani tun ta saruhan katô Manama. Igtawar tō Áglangngagán ki Moises tikud tun ta pabungan,

^c **19:1** 19:1 Duwa bulan, ó tun ta una álló tun ta ikatállu bulan. Igiwà dan tikud tun ta Ehipto ka ikasapulù áppat (14) álló katô una bulan. Igsulat ni tun ta Exodo 12:6.

na mà din, “Ni gó tō kagin ku katô mga rubbad i Israel,^d ⁴ Igkita yu tō iglumu ku tun ta mga taga Ehipto. Isóddóran yu na igapid ku sikiyu tun ta madani ku, iring katô kapid katô banug katô pispis din tun ta mga pakpak din. ⁵ Atin ka mánnal kó kanak asta tumuman kó katô kasabotan ku tun ákniyu, imun ku sikiyu na mga manubù na igsalin ku tun ta langun manubù, su sakán tō tigatun katô tibuk banuwa. ⁶ Imun ku sikiyu na kanak mga manubù tun ta pagpangulu ku ébô pabantugánnna ikiyu tun ta langun banuwa. Na, ulit nu ni igkagi ku tun ta mga rubbad i Israel.”

⁷ Purisu igtupang si Moises, iglimud din tō mga ágpangulun, asta igulitan din sikandan katô igkagi katô Áglangngagán kandin. ⁸ Igpadángngané dan langun igtaba, na mà dan, “Bánnalán dé tō langun sugù katô Áglangngagán.”

Purisu igulit si Moises katô Áglangngagán ka ándin tō igtaba dan. ⁹ Igkagi tō Áglangngagán ki Moises, na mà din, “Madunna diyan áknikó ukit ka mangittáng sagulapun ébô makadinág tō mga manubù ka tumóngkô a áknikó. Purisu inalayun dan sumarig áknikó.”

Igulitan i Moises tō Áglangngagán katô igkagi katô mga manubù. ¹⁰ Igkagi tō Áglangngagán ki Moises, na mà din, “Tupang ka tun ta mga manubù, asta ni álló ni asta simag, pataganà nu sikandan ébô mangadap dan kanak. Kailangan labaan dan tō umpak dan. ¹¹ Kailangan tumaganà dan ka dì pa dumunggù tō ikatállu álló, su

^d **19:3** 19:3 Israel, ó Jacob. Si Jacob tō taganà ngadan i Israel.

sumunnadda tun ta pabungan ka Sinai róggun na sumállág tō langun dan. ¹² Pému nu tō mga pató tun ta lindig katô pabungan ébô dì lumapas tō mga manubù tun ta pabungan. Kagiyi nu sikandan na dì dan tumikáddág tun ta pabungan. Dì gó mému awidan dan tō lindig katô pabungan, su matayan gó tō dì mánnal. ¹³ Agad manubù asta mannanap, ka lumapas dan katô pató tun ta pabungan, kailangan timbagán dan ka batu ó panaán dan ébô maté, su dì mému awidan yu tō lumapas katô pató. Kailangan lumili tō mga manubù katô pabungan sippang ka idupán tō trumpetá. Atin ka dinággán dan tō trumpetá, kailangan malimud dan tun ta lindig katô pabungan.”

¹⁴ Na, igtupang si Moises katô pabungan, asta igpataganà din tō mga manubù ébô mangadap dan. Iglabaan dan tō mga umpak dan. ¹⁵ Igkagiyán i Moises sikandan, na mà din, “Taganà kó para katô ikatállu álló, asta yakó ágpalayuké.”

¹⁶ Tō igsállám dán tō ikatállu álló, tuu igkilat asta igkirám tun ta pabungan. Igsunnad tō mangittáng sagulapun tun ta pabungan. Igdinág dan tō mabákkár dagingán katô trumpetá, asta igkárkár dan langun tingód ka máddang dan. ¹⁷ Igpíd i Moises tō mga manubù tikud tun ta kampo dan ébô sumumar katô Manama. Igtindág dan tun ta lindig katô pabungan. ¹⁸ Ándà kakitayi tō pabungan su isidalungan katô mangittáng ábbál, su igsunnad tō Áglangngagán na iring na bónnóng ka apuy. Ibatun tō ábbál iring na ábbál na ágtikud tun ta dakál ággóbbówanan. Tuu igkálláng-kálláng tō tibuk katô pabungan. ¹⁹ Tō tuu pa igmabákkár tō dagingán

katô trumpetá, igkagi si Moises, asta mabákkár tô kataba katô Manama iring na dalágdág ka kilat.
20 Igsunnad tô Áglangngagán tun ta bówwó katô pabungan ka Sinai, asta igtawar din si Moises na madun tun datas ta pabungan. Purisu igtikáddág si Moises.

21 Igkagi tô Áglangngagán ki Moises, na mà din, “Tupang ka, asta sugù nu tô mga manubù ébô dì dan lumapas katô pató. Dì mému tumikáddág dan ébô sumállág dan kanak, su maté tô lumapas.
22 Agad tô mga parì na ágpadani kanak, kailangan palinis dan agó matayan ku sikandan.”

23 Igkagi si Moises katô Áglangngagán, na mà din, “Asal dì tumikáddág tô mga manubù, su taganà ka igkagi kandan na dì mému. Igkagi nu kanak na imun ku tô pató ébô dì makapadani tô mga manubù tun ta pabungan.”

24 Asal igkagi tô Áglangngagán, na mà din, “Tupang ka pa, asta tikáddág ka puman na tákkássan i Aaron. Asal yaka nu ágpalapasi tô mga parì asta tô duma mga manubù ébô tumikáddág dan agó supakan ku sikandan.”

25 Purisu igtupang si Moises tun ta mga manubù, asta igulitan din sikandan katô igkagi katô Áglangngagán.

20

Tô Sapulù Mga Sugù

1 Ni gó tô igkagi katô Manama tun ta mga manubù, na mà din, **2** “Sakán tô Áglangngagán na Manama yu. Igpaluwà a ákniyu tikud tun ta kallang ákniyu tun ta banuwa ka Ehipto.

3 “Yakó ágpangadap katô ássa mga ágmanaman. Sakán dád gó tô pangadapán yu.

4 “Yakó gimu katô ágmanaman iring na bónnóng ka agad ándin tun ta langit, tun ta banuwa, ó tun ta dalám ka dagat. **5** Yakó ágpangadap asta áglingkóod kanan, su sakán dád tô Áglangngagán na Manama yu. Diya pabayà katô mangadap katô ágmanaman. Supakan ku tô méllé kanak, asta supakan ku tô mga gabatà din asta mga rubbad din sippang tun ta apù ka abul. **6** Asal tô mga manubù na ágginawa kanak asta ágbánnal katô mga sugù ku, tô gó é in-alayun ku ginawaan sippang tun ta mga mararan karubbadan.

7 “Yakó ágtawang ágkagi tingód katô ngadan katô Áglangngagán na Manama yu, su supakan ku tô manubù na tumawang kumagi tingód katô ngadan ku.

8 “Tuman yu tô ágkémun tingód katô álló ka kapaginawa, su tuu ugis tô álló ka kapaginawa. **9** Makalumu kó dalám ka ánnám álló. **10** Asal tô ikapittu álló, tô gó é álló ka kapaginawa yu ébô pangadapán yu tô Áglangngagán na Manama yu. Tun ta álló ka kapaginawa, yakó áglumu, agad sikiyu, tô mga gabatà yu, tô mga taratabang yu, tô mga mannanap yu, asta tô ássa mga manubù na góddô tun ákniyu. **11** Dalám ka ánnám álló, igimu ku tô langit, tô tanà, tô dagat asta tô langunlangun. Asal igpaginawa a tun ta ikapittu álló. Purisu igimu ku na madigár asta ugis tô álló ka kapaginawa.

12 “Respetowi yu tô ákniyu ámmà asta innà ébô kumallayat tô kantayan yu diyan ta tanà na

bággén ákniyu katô Áglangngagán na Manama yu.

¹³ “Yakó ágmaté.

¹⁴ “Yakó áglibug.

¹⁵ “Yakó ágtakó.

¹⁶ “Yakó ágtestigos ka bulaló tingód katô unawa yu.

¹⁷ “Yakó ágkasabuan ka balé katô unawa yu manubù. Yakó ágkasabuan ka sawa katô unawa yu manubù, mga taratabang din, baka din ó asno din, ó agad ándin tô kaduwánnan katô unawa yu manubù.”

**Kagi Ka Manama
New Testament and Shorter Old Testament in
Tagabawa**

copyright © 2004 Wycliffe Bible Translators, Inc.

Language: Tagabawa

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

New Testament and Shorter Old Testament

in Tagabawa

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 11 Nov 2022 from source files
dated 29 Jan 2022

bb1b22b0-020d-5555-b0e4-517943a1ed25